


دون حذف الرقابة

الاعمال
السينمائية

الدار المصرية للطباعة

طباخ الرئيس

يوسف معاطي



FAYROUZ2006

www.dvd4arab.com

إهداء

إلى الرائع المثقف السينمائي الناقد المبدع.. على أبو شادى الذى صار
ـ لسوء حظه وحسن حظنا ـ هو الرقيب على الأفلام.
والذى لو لا أنه أجاز هذا السيناريو ما كان الفيلم رأى النور، ولو لا أنه
حذف بعض المشاهد من هذا السيناريو ما كان هذا الكتاب رأى النور.

المقدمة

برغم أن السيناريوهات المطبوعة في كتب من أكثر الإصدارات مبيعاً في أوروبا وأمريكا، فإنها ليس لها الحظ نفسه في عالمنا العربي، فلا تجد الناشر يقبل على طبع سيناريوهات أفلام أو مسلسلات، وحتى المسرحيات أخيراً لم يعد لها القارئ الذي ينتظرها بشغف، ويقبل على قراءتها، ولقد حاولت أن أصل إلى السبب في ذلك.. فوجدت أن انتشار القنوات الفضائية وما تبثه بشكل دائم من الأفلام والمسلسلات، جعل المتلقى لا يكلف نفسه عناء القراءة والتخييل والتأمل، مادام العمل الفني متاح له بصورة سهلة للغاية، ومادام العمل الفني يأتي إليه في الوقت الذي يشاء بضغطة بسيطة على الريموت كونترول، فما الداعي لأن يبحث عنه في المكتبات؟ ويجده نفسه في القراءة؟!

وبرغم ذلك.. فقد تمنيت كثيراً أن أطبع أعمالى الفنية سواء السينمائية أم التليفزيونية في كتب بالصور الأصلية التي كتبتها بها.. ولا أعلم لماذا تمنيت ذلك!! هل خرج المخرج مثلاً عن الإطار الذي أردت أن يظهر به الفيلم أو المسلسل؟ لا أبداً. فمعظمهم حافظ قدر استطاعته على أن يقدم العمل في الصورة التي أحببت أن يظهر بها.. هل كان الإنتاج مثلاً ضعيفاً أو شيئاً من هذا القبيل؟ لا.. لم يحدث. كان الإنتاج دائمًا يحاول أن يرضيني، ويرضى العمل الفني.. هل قصر الممثلون الذين قاموا بالأدوار التي كتبتها - إطلاقاً - بل قدموها بإبداع حقيقي يستحق الإشادة. إذاً لماذا أريد أن أطبع سيناريوهاتي؟ أقول لكم..

أولاً: لقد بذلت جهداً مضنياً في كتابتها.. وأريد للقارئ أن يبذل جهداً هو الآخر في تأملها واستيعابها.. لتزداد المتعة ويزداد الأثر..

ثانياً: لأن القارئ حينما يقرأ السيناريو يصبح هو المخرج الثاني للعمل.. فيترك لشاشة ذهنه حرية الرؤية والتصور الخاص به.

ثالثاً: وهذه نقطة مهمة أن أشياء تسقط من السيناريو عند التنفيذ لأسباب كثيرة منها مثلاً الرقابة.. ومنها أيضاً رغبة المخرج في التخييص والإيجاز، لأن العمل السينمائي له إيقاع خاص يملكه غالباً المخرج.. أما إيقاع السيناريو المكتوب والمقروء فهو الذي يراه الكاتب وحده.. ولابد أن ينصاع الكاتب لرأي المخرج لأن العمل السينمائي أو التليفزيوني عمل جماعي لابد وأن نتعاون جميعاً ونقرب وجهات النظر مهما اختلفت ليخرج العمل إلى النور.

أما الكتابة فهي عمل فردي يعبر عن وجهة نظر شخصية هي وجهة نظر كاتبه. شيء آخر أحب أن أشير إليه وهو أن كثيراً من شباب الكتاب يريدون أن يجربوا كتابة السيناريوهات، وكثيراً ما يطالبونني أن أعطيهم نسخة من سيناريو قد تم لكن يطلعوا عليه.. كنموذج يساعدهم على المحاولة الأولى.. وقد يتصور البعض أن قراءة السيناريو مسألة صعبة أو معقدة

تطلب دراسة أو شرحاً.. إطلاقاً.. بل أنا أتصور أن قراءة السيناريو أسهل من قراءة الرواية.. بل هي أقرب إلى قراءة القصة القصيرة.. فكل مشهد من مشاهد السيناريو هو قصة قصيرة مستقلة بنفسها. ويحدد المشهد عنصرى الزمان والمكان فى وقت ومكان حدوث المشهد.. وعلى اليمين دائمًا ترى الوصف.. وصف المكان أو وصف الشخصية أو وصف مشاعرها لحظة الكلام، بينما على يسار الصفحة تجد الحوار وحده بين الشخصيات.. وكأنه يحدث أمامك بالضبط.

وهناك نقطةأخيرة أحب أن أشير إليها وهي الفائدة التي تعود على القارئ العادى، من غير المشتغلين بالفن أو الحالمين به، حينما يقرأ سيناريو، فالحقيقة أن فن السيناريو هو فن الحياة نفسها بتفاصيلها الدقيقة وما أحوجنا دائمًا في الواقع الذي نعيشه إلى أن تكون عندنا القدرة على كتابة سيناريوهات المواقف التي نتعرض لها: تأخرت مثلاً حضرتك عن موعد العمل اليومى.. والمدير لايرحم.. ويجب أن تدخل له لكي تبرر له سبب تأخرك.. أنت هنا في حاجة إلى سيناريو متقن تحكى له.. وكلما كان السيناريو الذي تحكى منه منطبقاً كان مقنعاً.. ضبطتك المدام جالساً في كازينو مع «مُزّة حسناء» ماذا تقول.. «ماذا تحكى؟! إيه السيناريو؟! ولا تنكر عزيزى القارئ.. أنت جميماً بدأنا القراءة بطريقة السيناريو في مجلات ميكى وسمير وتان تان، وكنا نستمتع بذلك جداً ونتعايش معه بصورة كبيرة.. وإن كل أكاذيبنا ونحنأطفال يرجع الفضل فيها إلى قراءة السيناريوهات التي قام ببطولتها عم بطوط وعم دهب.. وميكى وميمى وبلوتو.. ثم إن كلمة سيناريو لم تعد تستخدم في المجال الفنى فقط.. بل صارت كلمة شائعة في السياسة أيضاً.. ألم تقرأ الماشييات التي تقول.. سيناريو أمريكا في العراق.. وسيناريو الانتخابات في المرحلة المقبلة.. وبالتالي فالسيناريو صار يفرض نفسه علينا في كل مجالات الحياة، لنقرأ السيناريو ولنتعلم كيف نؤلف السيناريوهات الخاصة بحياتنا ببراعة تنقذنا من مواقف كثيرة سن تعرض لها بالتأكيد.. ولنتذكر دائمًا قول الشاعر:

الدراما مش حصل وح يحصل إيه

سارة
لورن

مشاهد متتالية قبل بداية الفيلم



تبدأ العناوين.. ونحن نرى بدايات مرور موكب الرئيس.. والكوبرى خالٍ تماماً من المارة. العسكريون الواقفين على مسافات متساوية فى الطريق والشوارع.

حالة توتر الضباط.. شوتات مختلفة.. لجندى يقف انتباها.. وضابط فى منتهى القلق يمسك باللاسلكى.

ثم يمر موكب الرئيس.. سيارة الرئيس وخلفها التشريفة كاملة.. ولا نرى وجه الرئيس.. ربما نرى علم مصر فوق السيارة.

قطع

شوارع
الإشارات المزدحمة والتوقف التام، وحالة القلق والذهق عند قائدى السيارات.. والبعض ينزل من سيارته وينظر أمامه.

قطع


شوارع
مرور الموكب مرة أخرى.
نرى يد الرئيس وهى تشير من السيارة فقط.
الموكب.. نرى وجه الرئيس لأول مرة وهو ينظر من السيارة.

نرى سيارات الأمن والأسلحة.

ثم يعود برأسه إلى الوراء.

الموكب والرئيس ينظر فيجد كل الأسر واقفة
في balconies لكي يروا الرئيس.. الرئيس ينظر
إليهم من السيارة.. ويخرج يده محيياً لهم
فيحيونه بحماس شديد فيبتسم لهم بسعادة
ويمر الموكب.

قطع





الرئيس: إيه ده يا كريم.. الناس دى كلها طالعة ليه؟

كريم: حب الناس يا رئيس!.

الرئيس: والعيل سابوا مدارسهم ليه هما كمان.

حازم: لما عرفوا إن سيادتك معدى.. خرجوا يرحبوا بسيادتك.. مقدرش نسيطر عليهم يافندم!.

الرئيس: اركن لى فى أى حته يا حازم.

حازم: خير يا رئيس!.

الرئيس: عاوز أعمل زى الناس.

حازم: نرجع المكتب يا رئيس.

الرئيس: لا.. أنا عاوز أروح مراحيل عمومية عادية خالص.

حازم: حاضر يا فندم.

سيادة الرئيس: عاوز يعمل زى الناس.

موكب الرئيس والناس يهتفون له. وهو يشير لهم من السيارة.. والطوابير واقفة على الطريق تحمل هتافات التأييد.. مرحبة بالسيد الرئيس.

يرى أطفال المدارس.

لحظة صمت.. والرئيس يتأمل الشوارع الجميلة والأشجار الوارفة.

حازم يهمس في الجهاز.

قطع



الضابط : زى الناس.. حاضر يا فندم.¹.

ضابط فى سيارة شIROOKI يرد على اللاسلكى.
قطع



السيارة تقف أمام مراحيض عمومية رائعة من
 الخارج.. مثل المساكن الجاهزة الأوروبية.
 الرئيس ينزل.. ويتأمل المدخل.

الرئيس : دى القرية الذكية.
حازم : لا يا فندم.. دى المراحيض العمومية

الرئيس يدخل.. وخلفه حازم وبعض رجال
 الحرس الخاص.

قطع



نحن فى مكان غاية فى الفخامة.. مليء بالورود
ولافتات رائعة.. من نوعية.. لا يهمنا سوى راحة
الموطن.. اكتب رأيك فى المرأب.. ونحن
على استعداد لتلقي أى شكوى.


شاب وسيم للغاية يقف مرتدياً بدلة أنيقة..
يقدم للرئيس منديلاً معطرًا على صينية
فضية.. وزجاجة كولونيا وبيتسن في احترام
شديد.

الرئيس يدخل.. يتأمل المكان ثم.. يومئ
برأسه.

يخرج الرئيس.. وحازم يشير لرجاله أن كل
شيء تمام.

قطع

أكتب رأيك - في المرحاض





موكب الرئيس يتحرك من أمام المرحاض
ثم فجأة.. نرى ونشاً أو رافعة ضخمة ترفع
المرحاض.. وتتحرك به بعيداً والأشجار..
وكل شيء.. ثم نرى متولى الطباخ وهو مواطن
عادى مكان الحمام فى الخرابة واقفاً وحده فى
الخلاء وهو يتبول.. وينظر خلفه لا يفهم أى
شيء مما حصل.

- قتراث -



الرئيس يدخل مكتبه وهو في قمة الغضب ومن
ورائه حازم حسين وزير التموين.

الرئيس: الناس ح تعيش ازاي يا حازم.. لما
كيلو اللحمه يصل 40 جنيه الناس تأكل إيه؟
تأكل طوب.

وزير التموين: سعادتك عارف الزيادة
السكانية في ارتفاع مستمر.

الرئيس: وهما السُّكان بيزيدوا.. والمواشى ما
بتزيدش.. هو مشروع تحديد النسل ماشي على
المواشى.. والبني آدمين لأنّا.

حازم: سيادتك يا فندم ح تشوف بنفسك أكبر
مشروع لتسمين العجل في الشرق الأوسط
عندنا هنا في مصر في خلال يومين.

الرئيس: لأنّا ح أشوفه النهارده!.

حازم يعطيه ملفاً يوقع عليه الرئيس واقفاً.

يضحّك.

وزير التموين ينظر إلى حازم في ذهول.

قطع

مشهد : 8

نهار / خارجي

مشروع المواشى

نرى مزرعة بها 200 رأس ماشيه من البقر
وعربات تنزل عجول فى المكان.
وزير التموين ووزير الزراعة وحازم حسين
يتبعون العمل.

حازم، أنا قايل لسيادة الرئيس.. المشروع فيه
2000 راس؟!

و. التموين، اطمئن يا حازم بيه.. إحنا حولنا
صفقة العجول اللي كانت جايها من الصومال
ورايحة المدبح على هنا.. ما تقلقش.

قطع





موكب الرئيس.. وسيارته تقف أمام مزرعة العجول.. ينزل من السيارة وخلفه الرجال وهو ينظر إلى العجول.

وزير التموين: المشروع ده يا رئيس إحنا شغالين فيه بقالنا 3 سنين.. والمحصلة النهائية بعد التسمين 2242 راس.!

الرئيس: دول كلهم متربين هنا.!.
الوزير: طبعاً يا فندم.

الرئيس: الجاموسه دى من هنا.
الوزير: طبعاً يا رئيس.

الرئيس: والتور اللي هناك ده.

الوزير: صناعة وطنية يا رئيس.

الرئيس: البهائم دول كلهم غُرب عن المكان يا سيادة الوزير.

حازم: إزاي يا فندم.!

الرئيس: البهيمه الغريبة يا حازم لما بتروح مكان جديد عليها بتقعد يومين مابتكلش.!.
والباقي ده كله صومالي.. رئيس مجلس إدارة المشروع ده يتحول للتحقيق.

يجد 50 راس فقط هى التي تأكل.

الرئيس يتأمل المواشى.

رد فعل على وجه حازم.

رد فعل على وجه وزير التموين.

الرئيس ينظر إليهما.. وينصرف.

قطع

مشهد : 10

نهار / خارجي

صالة بيت انشراح

أبناء صلاح خال انشراح بالمرail المدرسية
يستعدون للذهاب إلى المدرسة والتليفزيون
وببرنامج صباح الخير يا مصر.

مذيع النشرة: وتشجيعاً للثروة الحيوانية
فى مصر.. افتتح السيد الرئيس مشروع الدولة
لتسمين العجل المصرية مية فى المية.. ويحتوى
المشروع على 50 ألف رأس من الماشية.

أم انشراح تحاول الانتهاء من ذلك كله.. تعد
الساندويتشات لهم.

طفل 1: كل يوم فول.

طفل 2: عاوزين حلاوة.

طفل 3: عاوز مربي.

أم انشراح: مفيش غير فول وما تعصبوني
أنا مش ناقصاكو.

ما تصحى يا صلاح تشوف عيالك.

صلاح: فيه إيه يا تقىده ع الصبح؟!

تقىده: هو انت قاعد لى فى البيت إنت
ومراتك عشان تخلفوا بس ما تخلى الشملولة
تقوم تلبس عيالها وتقطرهم.

صلاح: تعبانة يا تقىده.. تعبانة.. طول الليل
نفسها غاممة عليها.

تقىده: يا لهوى.. إنتوا ناويين تبلونا بعيال تانى.

تبخط على باب حجرة صلاح.
يفتح الباب مستاءً.

قطع



متولى يقوم بعمل طبق لا نعلم ما هو على البوتجاز بمهارة شديدة.. وانشراح بجواره.. على صوت تفيدة وهى تقول الجملة الأخيرة.. يالهوى.. إنتوا ناوين تبلونا بعيال تانى.

صارخاً.

وهو يمسك انشراح محاولاً تقبيلها.

متولى: عقبالنا يارب.. أنا ح أموت يا انشراح.. نفسى فى حته عيل بأه بقالنا سنة ومفيش أى حاجة.

انشراح: وبعدين يا متولى.. لا العيال يخشوا علينا.. اتلهم.

متولى: أنا ملهموم من يوم ما اتجوزنا يا انشراح.

انشراح: هانت.. هوه فاضل كام قسط على الشقة ونستلمها.

متولى: أنا مش قادر.. مش قادر أستنى الشقة.

يحاول الاقتراب منها.

يدخل الأولاد مسرعين.. انشراح تنفلت من بين يديه.

تخرج مسرعة وهو فى قمة الإحباط.

قطع

مشهد : 12

نهار / خارجي

صالة بيت انشراح

انشراح خارجة من المطبخ.
يخرجون ويتوجهون نحو الباب.

تفيده : ح تنزلى كده وانت على لحم بطنك!..
انشراح : مش ناقصة كلام من الناظر
يا ماما.. ياللا يا عيال.

يخرج متولى مسرعاً وينادى عليها وهو ينظر
نحوها كعاشق ولها..
على السلم.. حجرة بالبدروم يعيش فيها الأولاد
يخطفون الساندوتشات في سعادة ويجرون.

متولى : أبلة انشراح
انشراح : نعم يا متولى!..
متولى : امسكى.

انشراح : إيه دول؟!.

متولى : ده واحد سمين وواحد مورته!..
انشراح : ح أفتر سمين ومورته يا متولى؟!..
متولى : ده انت مدرسة ألعاب.. يعني شقيانة
طول النهار.. أنا عاوزك تقعدى مع نفسك كده
في الفسحة وتعضى فيهم.

انشراح : أنا مش رايحة المدرسة.. أنا رايحة
النقابة.

متولى : خير يا أبلة انشراح.
انشراح : رايحة أقدم شكوى في نقيب المعلمين.

قطع



متولى : وأنا أشتكي لمين بس.. اسمعى..
أنا أخذت مفتاح شقة واحد صاحبى..
شقة مفروشة.. تخلصى حচصك
وتجينى ع العربية ونروح على هناك.
انشراح : تاخد مراتك شقة مفروشة يا متولى.
متولى : مش أحسن ما اخذ حد غريب.!

قطع



ص صلاح : .. يا متولى.. يا متولى.!
متولى : أوامر يا عم صلاح.
ص صلاح : تعالالى هنا.!

قطع

متولى خارجاً وراءها على السلم.

مشهد : 14

نهار / خارجي

على سلم متولى

صراخ صلاح من فوق.
انشراح تنزل هي والأولاد.
متولى يرتبك.

يطلع إلى صلاح.



صلاح: أنا راضى ذمتك يا متولى.. إنت راجل
طباخ بريم وعشرة على عشرة وكفاءة..!.. مش
عشان ما انت جوز بنت اختي..!

متولى: خير يا عم صلاح.

صلاح: إيه ده.. دوق كده وسمعني.

متولى: ده.. ده.. أنا طبخت كتير وقليل يا عم
صلاح إنما ده ماوردش عليا قبل كده.

صلاح: الهانم تستكردنى.. قال إيه؟ ده
خُبيزه؟ ده خُبيزه!..

متولى: ده برسيم بالدمعة.

صلاح: بس.. حكمت يا متولى.. بياه لما واحدة
تحط لجوزها ع الفطار برسيم بياه إيه؟!

متولى: بياه حمار.

صلاح: هوه مين ده يا متولى.

متولى: وهو فيه حد بيغطر طبيخ ع الصبح
يا عم صلاح.

صلاح: أنا كده يا أخي.. حد شريكي!..

متولى: اسمع يا عم صلاح.. إنت تسيبك من
اللى فى إيدك ده.. أنا ح أعمل لك طاجن كوارع
من اللي وصى عليه لقمان.

صلاح ومتولى واقفين أمام بيت انشراح.

يعطيه طبقاً به طبيخ.

يتذوق ثم يتحقق.

متولى يأخذ جانباً ويهمس له.

صلاح؛ والنبي يا متولى.

متولى؛ محبة يا راجل.. ده احنا أهل.. بس لو
تسيب لى الأوضة الليلاً دى عشان أريح فيها أنا
وأبلة انشراح.

صلاح؛ تدفع أرضية.

متولى؛ أرضية يا عم صلاح؟.. دى آخرتها!

صلاح؛ اتكل انت على الله يا متولى.. اتكل
على الله دلوقتى!.

صوت زوجة صلاح تناديه بنعومة.

صلاح!..!

فيبدو عليه أنه يريد الاختلاء بها.. يدفع متولى
خارج الباب.

رد فعل على وجه متولى في قمة الغيظ..

يخرج.

قطع



المراة 1: سى متولى.

متولى: نعم يا أم إبراهيم.

المراة 1: خلطة المحسى بتبوظ منى.. أعمل لها إيه بس؟!

متولى: سلقتى الكرنب!

المراة 1: سلقاه ومقطعاه.

متولى: حطيتى ورق اللورى وجوزة الطيب.

المراة 1: زى ما قلت لى بس برضة بتسيب منى.

متولى: ده مش عيب خلطة.. أنسفى عليها وانت بتمشيها.

المراة 2: سى متولى.

متولى: نعم انت روخره.

المراة 2: الملوخية ساقطة فى الحلة.

متولى: تبأى ما شهقتش.

المراة 2: والنبي شاهقة لها.

متولى: سمعينى شهقتك.

متولى: دى شهقة بامية الله يخرب بيتك.

المراة 3: سى متولى!

متولى: ما تسيبونى فى حالي بأه.. هى الحارة

دى ماوراهاش غير الأكل.

قطع

متولى خارجاً من بيته.. وهو في قمة الضيق..

تفتح أحداهن الشباك.. امرأة جميلة.

متولى أثناء مشيه في الحارة.

يمضي.

امرأة أخرى تفتح الشباك.

المراة تشهق.

امرأة ثالثة.

يمضى بسرعة وهو في قمة الغيظ.



انشراح: واحد.. اتنين.. مسافة دوغرى..
ثنى.. مد.. نستريح شوية بأه ونجري فى
مكاننا.. ياللا..!

انشراح تقوم بعمل التدريبات الرياضية للأطفال.

ع الفضيل: إزيك يا أبله انشراح..!
انشراح: الله يخل حضرتك يا حضرة الناظر.
ع الفضيل: انت خاسة شوية.
انشراح: ما هو من التدريبات يا حضرة
الناظر.. أنا مدرسة ألعاب.
ع الفضيل: وليه كده.. ما تربربى شوية يا أبله
انشراح.
انشراح: أربرب.
ع الفضيل: قصدى يعني عشان تقدرى تكملى
الشخص بدال ما تدوخى وتقعنى.
استمرى فى التدريبات.

عبد الفضيل الناظر.. يمر وهو ينظر نحو
انشراح بإعجاب.

انشراح: حاضر.. حاضر يا حضرة الناظر.
ع الفضيل: يعني جايه متاخرة النهاردة.
انشراح: كنت فى النقابة.. ما أنا قايلاك
يا حضرة الناظر.
ع الفضيل: انت مش ح تبطل شكاوى يا أبله
انشراح.. ما تركزى فى شغلك وتخليكى فى حالك.
انشراح: ما هو ده اللي مبوظ البلد.. كل واحد
يقول ياللا نفسى..!

عبد الفضيل يحضر كرسى وهو يتبع حركات
انشراح الرياضية.

قطع

مشهد : 18

نهار / خارجي

عربة متولى

الكاميرا تستعرض مصر القديمة وميدان السيد عيسه.. لنرى عربة «طاجن متولى».. وهي عربة خشب بسيطة.. يظهر فيها الطعام ونرى خلف العربة لافته مكتوب عليها متولى الطباخ.. ينتخب السيد الرئيس مدى الحياة.
«بصله» مساعد متولى وهو شاب قصير دماغه كبيره بعض الشيء.

بصله: إيه اللي أخرك يا أسطى.. بتوع الحى عدوا وكانوا عاوزين يشيلوا العربية.
متولى: عملت إيه؟!

بصله: حلة الحى كانت جاهزة.. لقيتها واديتها لهم.. وح يعدوا عليك بالليل.

متولى: وفين حلة التأمين الصحى.

بصله: ما هو الرجال جه وسأل على الشهادة الصحية.

متولى: واديته الشهادة؟!

بصله: لأ.. اديته الحلة.

متولى: فيه حلة ناقصة ياد يا بصله.. حلة البلدية راحت فين؟!

بصله: اديتها لبتوع الكهربا.. الظاهر حد شكك شكوى فى الكهربا عشان بتسرق الكهربا من العمود.

متولى: والبلدية أما تيجى ح نعمل إيه معاهم ياد!

متولى ينظر فى العربة يتمم على الحل.

بصله : أنا بجهز لهم طاجن عكاوى حاكم
البلدية بتحب العكاوى.

يقترب منها رجل ضرير يرتدى نظارة
سوداء.. شحاته.

شحاته : نهارك حليب يا أسطى متولى.
متولى : بص يا عم شحاته.. إنت أديلك أربع
سنين تعدى الصبح تدعىلى وتأخذ اللي فيه
القسمه، وكل ما تدعى الدنيا تتكركب فوق دماغ
اللي خلفونى.. حط له ياد يا بصلة حته لحمة
فى رغيف.

شحاته : إلهى يا رب يفتحها فى وشك
يا متولى.

متولى : خلاص بأه يا عم شحاته.
شحاته : الهى ربنا يعمر بيتك يا متولى
يا طيب يا جدع.. نهارك نادى مادام استفتحت
بيا ح تشوف الخير اللي ح ينزل يرف عليك.

سيارة البلدية والعساكر ينزلون منها أمام
عربة متولى.

د. البلدية : شيل يابنى الحاجة دى وطلعها
ع العربية.

متولى : الله يخرب بيتك يا عم شحاته.

قطع

طواجن متولی





حازم: أنا شايف إن سعادتك ماتروحش
الزيارة دي يافندم.¹.

الرئيس: ليه يا حازم.. أنا لازم أروح أشوف
بنفسى إيه اللي تم.¹.

حازم: كل توجيهات سعادتك اتنفذت يافندم
بالحرف الواحد... بس أنا شايف إن الأسلم إن
سعادتك ماتروحش لدواعى أمنية.

حازم يقترب من الرئيس.

الرئيس فى ضيق يتنهى يائساً.

قطع



الرئيس فى البيت والكاميرات تصور الزيارة.
الرئيس يدخل لنجد فلاحاً تبدو عليه الطيبة.
يقبله.. ثم نجد فلاحة بسيطة تسلم عليه فى خجل.

الرئيس : إزيك يا بسطاوى!.

بسطاوى : الله يسلنك ويحميك من كل ردى
يا سيادة الرئيس.

الرئيس : إنت متجوز يا بسطاوى.
بسطاوى : أيوه يا رئيس.

الرئيس : عندك كام عيل.
بسطاوى : خمسة يا رئيس.

الرئيس : ماتخلف شوية يا بسطاوى... ومين
دى يا بسطاوى.

الفلاح : دى مسعده مراتى يا سيادة الرئيس.
الرئيس : إزيك يا مسعده.

مسعده : ربنا يخليلك يا سيادة الرئيس.
الرئيس : إيه.. إنتوا بخلا والا إيه.. مش
ح تشربونا شاي.

مسعده : جاهز يا سيادة الرئيس.

نرى لقطة لرجال الأمن وهم يعملون الشاي.
مسعدة تأخذ الصينية منهم.
وتدخل حيث الرئيس يتكلم مع الفلاح.. وتضع
الشاي.


بسطاوى : الحمد لله يا رئيس إحنا كنا
فين وبأينا فين.. ده إحنا كل يوم بنصللى
وبندعيلك!.

الرئيس: الله ينور عليكي.. الشاي بتاعك
مطبوط قوى.. ده أحلى من الشاي اللي بأشربه
فى بيتنا!.

الرئيس يتناول كوب الشاي ويرتشف منه رشـه

يضمـون.

قطع





مذيع النشرة ونرى فيديو للرئيس جائساً
يضحك مع الفلاح بسطاوي ومسعده.

المذيع : وقد تفضل السيد الرئيس بزيارة ودية
لأحد الفلاحين وزوجته، وتناول معهما كوبًا من
الشاي وكانت الجلسة ودية تماماً.

قطع



كريم مصباح يضع ملفات أمام الرئيس
والتليفزيون شغال بصوت واطى جدًا.. لنرى
كونديليزا على الشاشة.

الرئيس: اقلب لنا المحطة دي يا كريم.
كريم: يا فندم سيادتك بتشتغل من الصبح
لغاية دلوقت.. 14 ساعة كتير قوى يا فندم.

الرئيس ينظر إلى التليفزيون فيجد مسلسلاً..
تمثل به مسعده.. دور فتاه روشه جدًا.
الرئيس يندهش حيث يراها.

الرئيس: الوش ده مش غريب علياً يا كريم..
مين دي؟.

كريم: تلاقيها ممثلة جديدة يا فندم.
الرئيس: ممثلة جديدة إزاي.. دي مسعده
يا كريم.

ينظر إلى المسلسل مدققاً.

الرئيس: مرات بسطاوي اللي عملت لى الشاي
وأنا فى سمالوط فى الزيارة الأخيرة.
كريم: معقوله يا فندم؟!

الرئيس: جايبينى واحده كومبارس تمثل علية
إنها فلاحة من الشعب.

كريم: أكيد يا فندم.. اضطروا يعملوا كده
لإجراءات أمنيه.

الرئيس: وبسطاوي.. يطلع مين هو كمان.
كريم: عبد السلام الدهشان من المسرح
القومي يا فندم.

الرئيس ينفح فى غيظ.

قطع



متولى نائماً على الأرض وانشراح أيضاً
وبينهما الأطفال وتفيدة أيضاً ويترجران على..
التليفزيون.. وعبد الحليم حافظ يغني.. تعالى..
ضمني.. قرب.. كمان قرب.. هنا جنبي وهات
شووك على شوقى وهات حبك على حبى.. الكل
نائم إلا هما سهرانان من فرط الشوق.. متولى
يمد يده محاولاً حتى الإمساك بيدها.. دون أن
يشعر أحد.. وانشراح تخشى أن يستيقظ أحد..
الأم تتقلب.. يبعدان أيديهما بسرعة.
أحد الأطفال يصرخ فجأة.. لا.. لا.. لا (كان
يحلم).

متولى: ده حرام.. اللي بيحصل ده مايرضيش
ربنا.. ده أنا أيام الخطوبة كنت بأعرف أخطف
لى بوسة.. مسكة إيد.

انشراح: أسكط يا متولى.. بكرة في شقتنا
ح نعمل اللي إحنا عاوزينه.

متولى: شقتنا.. هي فين شقتنا دي.. إحنا
ح نطلع على المعاش قبل ما نستلمها.

متولى يُصاب بالذعر ويبعد يده بسرعة.

قطع



مشهد : 24

نهار / خارجي

مشروع إسكان شعبي

الرئيس يتقدّم بمشروع الإسكان الشعبي وبجواره
وزير لبناني.

الرئيس: أهم حاجة نسكن الشباب.. ليه..
لأن الشاب من دول جواه طاقة.. لو ما طلعتش..
ينفجر.. أنا كنت شاب وعارف.

الوزير اللبناني: طبعاً فخامة الرئيس..
طبعاً.

الرئيس: عندكم مشكلة في إسكان الشباب يا
سيادة الوزير!.

الوزير اللبناني: لا.. عندنا مشكلة في
الشباب يا فخامة الرئيس.. تعداد المواليد
الذكور أقل من المواليد الإناث خمس مرات.

الرئيس: طيب ما تيجوا تاخدوا شباب من
عندنا.. عندنا شباب هايل هنا في مصر.

قطع



مشهد : 25

نهار / داخل

كوريدور فى الرياسة

قاعة فاخرة فى الرياسة.

الرئيس جالساً مع وزير الخارجية اللبناني.. فى
جلسة ودية.

الوزير: فخامة الرئيس.. الأمة العربية كلها
بتشيد باللى فخامتك بتعمله.. ما فيه حل
 أمامنا إلا إن الحكم يقربوا من الشعوب عشان
 نرجع تانى نقف فى وجه الإمبريالية الغربية.
 الرئيس: بقولك إيه يا سيادة الوزير... أنا...
 أنا عاوز أسألك سؤال.

الوزير: أؤمر فخامة الرئيس.

الرئيس: الرئيس عندكوا.. بينزل الشارع.
 الوزير: أيوه فخامتك طبيعى.... بينزل يأكل
 فى المطاعم.. يقعد الروشه يشرب أرجيله..
 عادى... ما فيه مشاكل.

الرئيس: طيب وأمن الرئيس.

الوزير: أمن الرئيس.. هو حب الناس كلها
 لفخامته... ده فى مرة الحريرى.

الرئيس: هو مفيش غير الحريرى اللي تدینى
 مثل بيته.

قطع



مشهد : 26

نهار / داخلى

مكتب الرئيس

كريم: صباح الخير يا فندم.

الرئيس: اقعد يا كريم.. اقعد يا حازم.

حازم: خير يا فندم.

الرئيس: معلش جبتكم بدرى شوية بس
الصحيان بدرى مش وحش.!

حازم: لا بدرى إيه يا فندم.. الساعة بأت
خمسة ونص الصبح.

كريم: أنا حاسس إن سيادتك مشغول بحاجة
يا سيادة الرئيس.

الرئيس: قريتوا جرائد المعارضة.

كريم: قريتها يا فندم.

الرئيس: أنا ماوريتهاش... بس أنا حاسس إن
الناس مش مرتاحه.. فيه حالة شكوى عامة.

حازم: الناس اللي بيكتبوا الكلام ده يا فندم
أقلام مُفرضة بتحاول تعطل مسيرة التنمية اللي
سيادتك بدأتها.. وبستغل هامش الديمقراطية
اللي سيادتك....

الرئيس: حازم.. أنا مش جايبيك عشان أسمع
الكلام ده.. عشان فيه جرائد كتير كاتبه كده
برضه.. أنا مش ح أقبل أن علاقتى بشعبى تكون
من خلال كلام مكتوب ولا تقارير بتجيلى..
أنا لازم أعرف كل حاجة بنفسى.. وأنا قررت
خلاص أنا ح أعمل إيه!.

حازم وكريم يدخلان على الرئيس.

مقاطعاً.

كريم : خير يا فندم !؟.

الرئيس : يوم الاثنين اللي جاي .. بعد ما أخلص الشغل .. أنا ح انزل.

حازم : تنزل فين سيادتك.

الرئيس : الشارع.

رد فعل على وجه حازم وكريم وهما في قمة الدهشة.

أيوه .. مستغربين قوى كده ليه !؟ . هوه أنا مش مواطن زي أي مواطن من الشعب .. من حقى أنزل .. أروح السيدة عيشة .. أقعد على قهوه .. أتكلم مع الناس ويكلموني ..

حازم بيتسن يظن أنها نكته .. ثم كريم بيتسن .. ثم يضحكان .. والرئيس ينظر نحوهما وقد تجمدت ملامحه .. ثم يصرخ فيهما .
يصمتان في خوف .

أنا ما بقولش نكته عشان تضحكوا .
أنا ح انزل الشارع .. وح امشي لوحدي .. ولو فيه أي إجراءات أمنية اتعملت .. مش ح يحصل كويس .. أنا مش عاوز أي حد معايا في الزيارة دى .. مفهوم !؟ .

رد فعل على وجهيهما .

قطع



مشهد : 27

نهار / داخلي

مجلس الوزراء

قاعة مجلس الوزراء.. ونرى حازم وكريم
جالسين فى القاعة.. ونرى رئيس الوزراء..
والوزراء.

حازم: أنا حاولت شخصياً أكثر من مره مع
سيادة الرئيس.. بس سيادته مصر على موقفه..
ح ينزل الشارع يوم الاثنين.. مفيش فايده.

كريم: الحقيقة أنا مع سيادة الرئيس فى قراره
التاريخي ده.. الناس كلها بتحب الرئيس ولو لا
هو واثق من كده ما كانش اتخاذ القرار الجرىء
ده.

ر. الوزراء: يا كريم بيـه.. الحكاية مش
بسهولة دى.. وعشان كده أنا باقترح إن إحنا
نعمل يوم الاثنين عطلة رسمية.. عشان الشوارع
ع الأقل تهدا شويه.

كريم: وح نقول العطله دى بمناسبه إيه؟!

قطع



لقطة عامة من الخارج لمبنى وزارة الأوقاف.
قطع



الوزير: أنا أقترح نعمل يوم الاثنين اللي جاي
عيد.. ونسميه عيد الوحدة الوطنية.. والناس
فى الأعياد يا بتسافر.. يا بتقعد فى البيت.

قطع

وزير الأوقاف يتكلم فى التليفون.



مشهد : 30

نهار / خارجي

مبني وزارة الداخلية

لقطة عامة من الخارج لمبنى وزارة الداخلية.
قطع



مشهد : 31

نهار / داخلي

مكتب وزير الداخلية

الوزير: لا يا فندم ده حل وسط.. أنا لا يمكن
أوافق عليه بصفتي مسئول شخصياً عن أمن
الرئيس أنا لن أقبل بأقل من حظر تجول في
اليوم ده.. البلد فيها قانون طوارئ ومن حقى
أن أعمل حظر تجول فى أى وقت.

حازم: الرئيس مش ح يوافق... هو رافض إن
الأمن يتدخل يامعالى الوزير.

الوزير وأمامه حازم.

قطع



قاعة اجتماعات حيث يجلس مجموعة من الوزراء ورئيس الوزراء وحازم وكريم

و. الشباب: لو سمحتوى يا فندم.. أنا عندي اقتراح.. احنا نجيب منتخب البرازيل يلاعب المنتخب القومى.. وحسن شحاته جاهز.. مباراة مهمة زى دى حاتخلى الناس كلها تروح الاستاد.. أو يقعدوا قدام التليفزيون والشوارع ح تقضا خالص.

كريم: مش كل الناس مهتمة بالكرة يا سيادة الوزير.

و. الإعلام: أنا أقترح إن إحنا نعمل حفلة فى الصحراء.. فى طريق مصر إسكندرية.. نجيب فيها نانسى عجرم وهيفاء وهبى وروبي.. ونعمل الحفلة مجاناً.. مصر كلها ح تلاقيها هناك.

و. التعمير: من فضلك يا سيادة الرئيس هو الرئيس ح ينزل يروح فين؟!

حازم: معرفش.. هو قال كلام كده.. السيدة عيشة.. تقريباً.

و. التعمير: لو إدريتوني الإمكانيات سعادتك.. إحنا ممكن نبني السيدة عيشة ديكور فى مدينة الإنتاج الإعلامي وسيادة الرئيس بييجى يفتحها.

ر. الوزراء: كل ده كلام ما ينفعش مع الرئيس.

و. **الصحه** : مفيش غير حل واحد يا فندم..
إحنا نقول إن يوم الإثنين الجاي الساعة إتنين
ح يحصل كسوف شمسى مفاجئ.. وح تصدر
من الشمس أشعة مُضرة ممكن تسبب العمى..
وح نناشد السادة المواطنين أنهم يقفلوا
الشبايك من الساعة 2 للساعة 8 بالليل.

د. **الوزراء** : واللهى أنا شايف إن ده حل
معقول جداً.

قطع



الشيخ وهو يلقى خطبة فى الجامع.. فى الميكروفون.

الشيخ: سيسألون يوم القيامة عما فعلوا بهذا الشعب.. كان عمر بن الخطاب رضى الله عنه.. ينزل متخفيًا ليتفقد أحوال الرعية.. أما الآن فالناس جياع.. عرايا.

ونرى متولى جالسًا ومعه بصلة وآخرين فى المسجد.

متولى: آه والله يا عم الشيخ.. يسلم فمك.
الشيخ: ولا أحد من المسؤولين ينظر إليهم يا رئيس الجمهورية.. إن كنت أنت قدرنا.. فألطف بنا.. ألطف بنا.

متولى يقوم منسحبًا مذعورًا ووراءه الآخرون.
قطع

مشهد : 34

نهار / خارجي

العربة أمام الجامع

بصله : ما تاطف بینا إنت كمان يا أسطى متولى .. ولازمته إيه الشغل النهاردة بس .. إنت ماسمعتش اللي قالوه فى التليفزيون .. اللي ح يخرج ح يعمى.

متولى : عليا النعمه ما أقفل باب رزقى لما يحصل إيه

بصله : الناس كلها مروحين بيتوthem زى ما أنت عارف .. مفيش زباين.

متولى : ما توجعليش دماغى ع الصبح .. كسوف مش كسوف أنا فاتح وشغال .. ح نجيب قسط الشقة منين .. لو خايف على نظرك روح .. أنا بقولك أهوه.

بصله : لا .. أنا عينيا مزغلة يا أسطى .. أنا ماشي ..!

لا يزال صوت الشيخ فى الميكروفون.

بصله يجرى مبتعداً ومتولى ينظر نحوه فى غيظ.

قطع



باب القصر يُفتح.. ثم نرى الرئيس وحده خارجاً
مرتديًا جاكيت خفيفاً على قميص مفتوح..
وحزاء خفيف ونضارة سوداء.

يبدو وكأنه يتقطل أنفاسه.. الرئيس يمشي في
الشارع المجاور لشارع القصر.. فلا يوجد أحداً
على الإطلاق.

لقطات مختلفة للرئيس.. في الشوارع وحده
ولا أحد من الشعب في الشارع.. والبيوت كلها
مغلقة لأن البلد مهجورة.


وهو في قمة الاندهاش.. حالة من الخواء
رهيبة.. يمكن أن نجده واقفاً وحده يتأمل تمثال
رمسيس.. ولا مخلوق واحد في الميدان.

الرئيس يخرج تليفونه المحمول.. يطلب رقمًا.
يغلق التليفون.
يجد تاكسي.. يشير له.. التاكسي يقف.
الرئيس يركب بجوار السائق.

قطع

الرئيس : آلو.. أيوه يا حازم.. الشعب فين؟!
انتوا وديتوا الشعب فين يا حازم.. 75 مليون
ما ألقاش منهم ولا واحد.. لا مش راجع.
ومش عاوز حد يجيلى.

وديت الشعب فين
يا حازم؟





السائق: على فين؟!

الرئيس: أى حته... ودينى السيدة عيشه.

السائق: حاخد تلاتين جنيه.

الرئيس: ليه؟!

السائق: عشان ح أرجع فاضى.

الرئيس: هية البلد فاضية كده ليه؟!

السائق: حد عارف لها حال.. يوم تبأه زحمة
موت.. والنهردة أهيه ولا كأننا فى صحراء..
وقف حال يا باشا.. كل يوم يطلعوننا بحاجة.
الباشا أنا زى اللي شفته قبل كده.

فى التاكسي.. السائق دون أن ينظر للرئيس.

الرئيس ينظر إلى الطريق.

السائق ينظر نحو الرئيس.

الرئيس يخلع النظارة.. السائق يفرمل بقوة
ويترك التاكسي ويخرج جارياً مذعوراً والرئيس
ينزل من التاكسي... يحاول أن ينادى عليه...
ولكن الرجل يفر من أمامه وكأنه رأى شبحاً..

الرئيس ينظر فى يأس.

الرئيس: يابنى إنت.. إنت يابنى.. إنت رايح
فين؟

الرئيس يرى أتوبيس نقل عام.. يقف فى محطة
قريبة فيجرى ويطلع إلى الأتوبيس.

قطع

مشهد : 37

نهار / خارجي

شارع

داخل الأتوبيس.. الرئيس فى زحام الأتوبيس...
وهم يدفعونه ولا يشعرون أنه بينهم
والكومسارى.

جميع الركاب يرتدون نظارات سوداء.

الكومسارى : آخر محطة المحطة اللي بعد
الجایة.. وح نجرش
أحد الركاب : ليه يا أسطى.. أمال ح نروح
بيوتنا إزاي؟!

الرئيس : آه صحيح.. الناس دى تروح بيوتها
إزاي؟

الكومسارى : خليك فى حالك إنت.. مش كل
واحد يطلع لى بكلمة.

الرئيس : ده أتوبيس نقل عام.. هوه أتوبيس
أبوكوا.

النشال : على إيدك يا أسطى..!

الكومسارى : بقولك إيه؟ يا نهار أسود..
الرئيس..!

الركاب : بالروح بالدم ح نكمel المشوار.

أحد النشالين ينط من الأتوبيس.
الكومسارى ينظر نحوه.. ثم يصرخ.
ويقع مغشياً عليه.. وركاب الأتوبيس جمِعاً
ي�폻ون فى صوت واحد.
ثم ديزولف.

قطع



النشال يخرج المحفظة... ويفتحها يرى
البطاقة... فيجد صورة الرئيس ويقرأ في
الخانة.. المهنة: رئيس جمهورية مصر العربية.
النشال يلقى بالبطاقة.. ثم يلقى بنفسه في النيل.
قطع



لقطة للأتوبيس خالي تماماً... والرئيس وحده
في الأتوبيس يمسك بالحديده.
قطع

مشهد : 40

نهار / خارجي

أمام الجامع

نرى الرئيس أمام الجامع.. حيث لا أحد يصلى..
ينظر باستغراب.

قطع



مشهد : 41

نهار / داخلي

داخل الجامع

الشيخ يصلى وحده.. قبل نهاية الصلاة يدخل
الرئيس ويجلس خلفه... وينهى الشيخ الصلاة.
الشيخ: جمعاً.

يراه يشعر ببرعب.. يفتح الميكروفون ويقول فيه
ونسمع الصوت وصداه.

يشير نحو الرئيس باحترام.
ثم يلتفت إلى الرئيس.

وأطیعوا الله وأطیعوا الرسول وأولى الأمر منكم.
دی فرصة سعيدة يا سيادة الرئيس.
تحب سيادتك تصلی العصر دلوقت!.

قطع



المقهى خال تماماً من الرواد.. إلا شحاته الأعمى
جالساً على المقهى.. يصفق ولا أحد يجيب.

الرئيس يقترب منه... ويجلس بجواره.

شحاته: يا الخواننا... فيه إيه؟ عمال أسفاف
م الصبح.

لا أحد يرد عليه.

الرئيس: انت عاوز إيه؟!

شحاته: انت فين من الصبح.. انتوا مالكوا
النهاردة.. عاوز حلبه حسا.

الرئيس: بس أنا.. أنا.. أنا زبون.

شحاته: لامؤاخذة ياحضرة.. العتب ع النظر.

ديزولف.

الرئيس يدخل بالحلبه الحسا ويعطيها للأعمى.

الرئيس: البلد كلها هاجرت ولا إيه النهاردة؟

شحاته: خايفين من العمى يا سيدى.. قال
يعنى من هنا اللي شايفينه.. المفروض إن أنا
اللي أخاف.

الرئيس: وتخاف من إيه؟!

شحاته: ما هي البلد كلها لو اتعمت زى
ما بيقولوا.. اللي زيس مش ح يعرفوا يأكلوا
عيش.. إنما.. أنا زى كده ما أكون قابلت
حضرتك قبل كده.. الصوت مش غريب عليا.

الرئيس يحاول أن يغير الموضوع.

الرئيس: إنت اتفديت.

شحاته : اتفديت .. هي سهلة كده .. الظاهر
إنك مش عايش في البلد دى .. أنا على لحم
بطني من الصبح .

الرئيس : طيب ياللا .. أنا عازمك ع الغدا ..
تحب تأكل إيه .

قطع



مشهد : 43

نهار / خارجي

العربة

شحاته والرئيس.. كل منهما يرتدي نظارة سوداء ويتوجهان إلى عربة متولى.. (يفنيان) ..

ياللا بینا تعالوا.. نسيب اليوم بحاله.

شحاته : متولى ده يا أستاذ بيعمل طواجن عجب.. أنا مجربه.. فلوسي كلها رايحة عليه!.

متولى : إيه يا عم شحاته.. هو ده يوم تيجى فيه.. إنت شايف الشغل ماشى قوى!.. ومين الآخر.. هوه

إنت مفيش مرة تجيب لى معاك حد مفتح.

الرئيس : شوفه يأكل إيه وأنا اللي حادفع الحساب.

متولى : حاضر.. تاكل إيه يا عم شحاته.

شحاته : طاجن كوارع.. وفته.

متولى : اللوش مش غريب عليا.

شحاته : هو راجل حسه حلو.. يخش القلب عاطلول.

متولى : ده إنت شبهه بالملائكة.

الرئيس : شبه مين!.

متولى : شبه الرئيس.

شحاته : الهى وانت جاهى تقابله يا متولى وسلام عليه.

متولى : آه لو أقابل الرئيس.. ده أنا كنت أقوله على بلاوى.

الرئيس : ح تقول له على إيه يا متولى!.

متولى : ح أقول له اللي بيحصل فى البلد من وراه.

الرئيس : إيه بأه اللي بيحصل فى البلد
يامتولى.

متولى : يا عم ما تخليناش ندوس فى الحل..
خلينا ساكتين. يضحك.

الرئيس : أنت بتحب الرئيس يا متولى.

متولى : بحبه.. ده أنا من حبى فيه انتخبته
مرتين.

الرئيس : إزاي؟!.

متولى : مرة بالبطاقة الانتخابية بتاعتى.. ومرة
بطاقة جوز خالتى الله يرحمه.. ده أنا معلق له
اليافطه دى وماشيلهاش من أيام الانتخابات.

الرئيس : للدرجة دى أنت بتحب الرئيس.

متولى : من ناحية بحبه.. بحبه.. بس لو
ماحطيتش اليافطه بتوع الحى ح يشيلوا العربية.

الرئيس : إنما أنت نزلت الشغل يعني وماخفتش
من العمى زى الناس كلها ما خافت.

متولى : ح نخاف من إيه.. قال ضربوا الأعور
على عينه.. ما أنت نزلت أهوه أنت كمان
ولا عشان ما أنت ضرير.

الرئيس : ما أنا قلت يمكن أفتح..!
هات الحساب.

متولى : 42 جنيه.

الرئيس يفتح فى جيوبه.. لا يجد المحفظة.

الرئيس : إيه ده.. المحفظة راحت فين؟!.

متولى : لا والنبي بلاش الحاجات دى يا عم الحاج.

الرئيس : كانت فى جيبى.. ماتخافش.. فلوسك
النهاردة ح تكون عندك.

متولى : هيا ناقصة ع الصبح.. ربنا يسهلك
يا عم هوه يوم أغبر من أوله.. ياللا.. ياللا
اتوكلوا على الله.

قطع

الرئيس ينظر إلى اللافتة التي علقها متولى يؤيد
فيها الرئيس.

رد فعل على وجه الرئيس

الرئيس ينظر إلى الأفق فى ضيق.. ثم يزفر فى
آسى.. مع مؤثر موسيقى.



الرئيس: إذا كنتوا فاكرین إنكوا فضيتووا
البلد عشان تحافظوا عليها.. تبأوا غلطانيين
يا حازم.

الرئيس داخلاً إلى المكتب وخلفه حازم وكريم.

حازم: يا فندم والله إحنا...

الرئيس: فيه واد طباخ اسمه متولى.. واقف
على عربية أكل.. الواد ده بيحب يشتغل هنا فى
الرياسة.. معايا!.

حازم في قمة الدهشة والذعر وكريم بيتسم.

قطع

مشهد : 45

ليل / داخلى

بيت انشراح

متولى : يا حماتى .. صدقينى .. انت منظورة
انت وعم صلاح .

أم انشراح : وح نعمل إيه يا متولى .

متولى : انت تطلعى من الفجر كده على طنطا
تروحى السيد البدوى .

أم انشراح : آه والنبي .. يسلم فمك .. أنا
مشتاقاله قوى .

صلاح : اتكلى على الله يا أم انشراح .

متولى : وهى ح تروح لوحدها .. ما أنت أخوها
ولازم تبأه معها .

صلاح : والعيال نسيبهم مع أمهم .

متولى : أمهم إيه ؟ .. والعيال كمان قبلكوا لازم
يروحوا يأكلوا حب العزيز .. مش كده يا عيال .

الأولاد : أيوه .. عاوزين نروح معاكوا .

متولى : وأنا بأه بكرة ح أخلص شغلى وأجي
هوا عشان انشراح ماتقعدش لوحدها .

شي الله يا سيد يا بدوى .

العيال يهتفون .

متولى بيتسم في خبث .

انشراح تبتسם .

قطع

مشهد : 46

ليل / داخلي

قاعة المؤتمرات

حفل العيد الوطنى للبلد.. والرئيس جالساً فى أول صف وخلفه حازم.. وكريم.. ونرى أحد الممثلين أو النجوم يلقى كلمة للرئيس.

الممثل: لكان القدر أرسلك إلينا فى لحظة فاصلة من تاريخ الأمة.. وكأن سفينة الوطن كانت فى حاجة إلى الربان الماهر الذى يصل بها إلى بر الأمان.. أنت الذى قُدت أمتنا إلى الرخاء.. إلى الحرية.. إلى الديمقراطية.

ص متولى: آه لو أقابل الرئيس كنت أقول له ع اللي بيحصل فى البلد من وراه.

الرئيس: الواد متولى فين.. أنا مش قايل لكوا تجيبوه.

الرئيس يبدو عليه الملل من الكلمة.

فلاش صوت الممثل.. ونسمع صوت متولى.

الرئيس يهمس إلى حازم الذى يتحنى عليه.

قطع





متولى : أيوه يا انشارح.. خلاص بأشطب
أهوه.. النهاردة للصبح بأه.. باموت فيكي..
القميص البنفسجي.. آه.. اللي ما حالفنيش
الحظ فى سنة جواز وأشوفك لابساه.. لدرجة
أنى أفتكرت إنك جايياه لحد تانى.. آه ياريت
يأبله انشارح.. مش ح اتأخر.

بصلة : واحد بامية باللحمة الضاني
ياأسطى.

متولى : هما الزباين دول بيعاندوا معايا..
أشمعنى نفسهم افتحت الليلادى بس.

بصلة : حد يقول للرزق لأ يا أسطى متولى.

متولى : والرزق اللي في البيت ده أعمل فيه
إيه.¹⁶

متولى يكلم انشارح من تليفون في العربية.

قطع



نرى الرئيس جالساً والعزبي يلقى بأحد مواتيله
التي تمدح الرئيس.
والرئيس يبتسם.. ويصفق.

قطع



انشراح جالسة بالقميص البنفسجي.
نرى الرئيس والعزبي في التليفزيون يغنى له.
انشراح: الإيراد 500 جنيه مرة واحدة..
تصدق أنا اتفاءلت بالليلة دي يا متولى.. لا..
على مهلك أنا باتفراج على التليفزيون.

قطع

مشهد : 50

ليل / خارجي

العربة

متولى : هيه أمك وحالك صلاح نابرين على
الليلة دي.. مصر كلها جاية تاكل عندي..
اسمعي يا انشرح.. شوحي نص كيلو كبدة
ونزلى السبت لأبو جورج.. قوليله يحط لك 9
قرايز بيرة مشبرين.. أضربي انت تمانية لحد
ما آجي عشان تباء دماغك حلوة.

متولى يكلم انشرح.. وزحام شديد.

قطع

مشهد : 51

ليل / داخلي

بيت انشرح

انشرح : بيرة.. أنت مجنون يا متولى.. طيب
ياللا تعالى إنت بس!.

ضاحكة في أنوثة.

قطع

مشهد : 52


ليل / داخلي

قاعة المؤتمرات

استعراض وطني عن إنجازات الرئيس.. فرقة
استعراضية.

والرئيس بيتسم في ملل.. ويثناءب.
ثم ينظر في ساعته.. ويكلم حازم في أذنه.
حازم يشير نحو المسرح.. فيقف الاستعراض
في منتصفه.. ينزل السلام الجمهورى فجأة
ويقف الجميع.

قطع





متولى يحمل أكياس الطعام.. ويمضي مسرعاً
يشير لميكروباص.. لا يقف.
فجأة تقف بجواره سيارة سوداء.. وبها بعض
الرجال الغامضون.

رجل: يا متولى.

متولى: نعم؟

الرجل: إركب عاوزينك.

متولى: فيه إيه يا باشا؟!

ينزل أحد الحراس من السيارة الخلفية.

ويمسك بمتولى ثم يركبه السيارة.

الرجل: بشوиш يا أحمد.. إحنا مش
قابضين عليه.

متولى: خير يا باشا.. أنا عملت حاجة غلط؟.

الرجل: مفيش.. اطمئن خالص.

يضعون شريطًا على عينيه وتمضي السيارة.

متولى: أهوه أنا كده اطممنت.

قطع



ينزعون الشريط اللاصق من على عين متولى..
الذى يجد نفسه فى حجرة بها مكتب فخم
وتراييزة اجتماعات.. يجلس كريم مصباح
والرجال يحيطون به.
كريم يبتسم فى طيبة.
يفتح الباب يدخل حازم حسين.

حازم: هوه ده ده.

متولى: أنا عملت إيه يا باشا؟!

كريم: ما تخافش يا متولى.. أنا مش عاوزك
تتوتر.

حازم: ما تسترجل كده ياله.. وتجمد.. حد
لمسك.. خدوه.

قطع



الكشف الطبى على متولى فى شوتات سريعة
خاطفة للغاية.

(1) كشف الأظافر.. والأسنان والعين..
والأذن.

(2) يحلقون شعره.

(3) يدخلونه حمام ماء ساخن.. وبارد
يصرخ.

متولى: أنا عملت إيه يا باشا؟!

الحراس: اخرس بأه فى يومك؟!

يدخلون به إلى الحجرة.

قطع



كريم: يا حازم بيـه.. معلش هوـه أصلـه اتـاخد
كـده عـلـى طـول وـماعـنـدوـش أـي فـكـرـة.
حازـم: ما تـهـدا يـابـنى إـنـتـ فيـه إـيـهـ؟!

متـولـى يـنتـفـضـ منـ الرـعـبـ.

يدـخـلـ عمـ سـليمـانـ.. وـهـوـ رـجـلـ مـسـنـ تـبـدوـ عـلـيـهـ
مـلامـحـ الضـيقـ وـالـحزـنـ العـمـيقـ.

سلـيمـانـ: أـيـوهـ يـاـ باـشاـ؟
حـازـمـ: شـوـفـهـ يـاـ عمـ سـليمـانـ إـنـتـ...
متـولـىـ: أـنـاـ تـحـتـ أـمـرـكـ يـاـ عمـ سـليمـانـ.. أـنـاـ
وـاقـعـ فـيـ عـرـضـكـ يـاـ عمـ سـليمـانـ.
سلـيمـانـ: اـعـمـلـ لـىـ مـسـقـعـةـ يـابـنىـ.
متـولـىـ: إـيـهـ؟؟.. بـأـهـ كـلـ المـرـمـطـةـ دـىـ عـشـانـ
أـعـمـلـكـواـ مـسـقـعـةـ؟؟ـ.

حـازـمـ: اـشـتـغلـ مـنـ غـيرـ رـغـىـ..
نـفـذـ الـأـمـرـ.

ردـ فعلـ عـلـىـ وجـهـ متـولـىـ.

سلـيمـانـ يـأـخـذـ متـولـىـ لـنـرـىـ المـطـبـخـ لـأـولـ مـرـةـ فـىـ
الـحـجـرـةـ.. مـطـبـخـ مـفـتوـحـ.
بـسـرـعـةـ شـدـيـدةـ متـولـىـ يـعـمـلـ مـسـقـعـةـ.
أـحـدـ الـحـرـاسـ يـنـاـوـلـهـ لـعـمـ سـليمـانـ الـذـىـ يـتـذـوقـ
قطـعـةـ صـفـيرـةـ.

سلـيمـانـ: شـورـبـةـ عـدـسـ.
متـولـىـ: أـنـاـ أـعـرـفـ 26ـ نـوـعـ شـورـبـةـ عـدـسـ
يـاـ باـشاـ.
سلـيمـانـ: وـرـينـىـ.
متـولـىـ: عـينـيـاـ يـاـ عمـ سـليمـانـ.

نفس الشيء يتكرر.. ومتولى ينفذ الأوامر في حركة سريعة وشوتات سريعة وسليمان يتذوق ويلقى.. على موسيقى موحية راقصة سريعة متلاحة.. تخللها أوامر سليمان.

سليمان: الملحق كتير.

زود الكرس.

زود ورق اللوري.

كل هذا ومتولى يقوم بكل ذلك بهمة ونشاط وتوتر شديد.. ويمكن أن نرى الرجال يأكلون باستمتاع في النهاية.

كريم: إيه رأيك يا عم سليمان.

سليمان: مش بطال.

حازم: يعني ينفع يا عم سليمان؟.

سليمان: ينفع.. ماشي.

سليمان تدمع عيناه ويترك الحجرة.. وحازم يخرج خلفه.. للحرس.

كريم: سيبونا لوحدينا.

متولى: فيه إيه يا باشا؟!!.

كريم ينظر نحو متولى ويقترب منه ويضع يده على كتفه برقة.

كريم: متولى.. إنت بتحب مصر يا متولى؟.

متولى: طبعاً يا باشا.

كريم: يعني لو فيه مهمة وطنية عندك مانع إنك تأدبيها؟.

متولى: أنا رقبي فدا مصر يا باشا.. بس أنا.. ما أعرفش أعمل حاجة في الدنيا غير الطبيخ.

كريم: ما هو ده اللي إحنا عاوزينك فيه.

متولى: عاوزيني أطبخ لمصر كلها يا باشا؟!!.
دول 75 مليون.

كريم يقف.. وينظر نحوه في صمت وهو يتفرس ملامحه.

كريم: متولى.. إنت وقع عليك الاختيار عشان تكون طباخ سيادة الرئيس!.

متولى : الرئيس مين؟.

كريم : السيد رئيس الجمهورية.

رد فعل على وجه متولى..

وهو في حالة من الذعر والدهشة والفرح

الممزوج بعدم التصديق.

متولى : أنا يا باشا!!!.

كريم : أيوه إنت يا متولى.

متولى : إيدك أبوسها يا باشا.. أنا تحت أمر سيادة الرئيس.. أنا.. أنا مش عارف.. أنا بالحلم يا باشا.. الطشنى بالقلم يا باشا.. فوقنى.. عاوز أصدق اللي باسمعه؟.

كريم : تمالك أعصابك يا متولى.. اهدا خالص.. أهم شئ إنك تعرف خطورة وأهمية اللي إنت داخل عليه.

متولى : أنا بحب الرئيس قوى يا باشا.. عليا الطلاق من بيتي أنا انتخبته.

كريم : أهم شئ.. مفيش مخلوق يعرف إنك شفال في الرياسة.. مفهوم.. ولا حتى انشارح مراتك.. ولا تفيدة حماتك.. ولا صلاح خال مراتك.. ولا حد في الدنيا ياخذ خبر.

متولى : أمال ح أقول للناس إن أنا شغال فين؟.

كريم : زى ما إنت شغال على عربتك.. ووح تمضي استلام عمل من النهاردة.

متولى يأخذ العقد.

متولى : أمضى فين يا باشا؟.

كريم : هنا.

متولى : طول عمرى حاسس إن ربنا مخبيلى حاجة كبيرة قوى..

وهو يبكي.

إنما لامؤاخذة ياباشا.. هوه المرتب كام؟.

رد فعل على وجه متولى.

كريم : 350 جنيهًا.

متولى : كام؟.

كريم : فيه حاجة يا متولى.. المرتب مش عاجبك.

متولى : دول يفرقونى يا باشا.

كريم : ده الأساسى ممكنا بالحوافز والعلاوات
توصل لغاية 800 جنيه.

ده الوزير فى الحكومة مرتبه 2000 جنيه.

متولى : ده الأساسى.

كريم ينظر نحوه بارتياح.

قطع



متولى يمشى منكسرًا وهو يُكلم نفسه في حيرة.

متولى : 350 جنيه ما يكفوش.

350 جنيه ما يكفوش.

يرى صورة الرئيس وهو يحيى الجماهير..

بس تتقضى يعني.

يتوقف عن الكلام مع نفسه في الرعب.

قطع



متولى: مساء الخير يا أبو جورج.
أبو جورج: التسعة بيرة وصلوا فوق يا أسطى
متولى.
متولى: أبعث لى صندوق يا أبو جورج.

متولى محبطاً.. يمر أمام محل أبو جورج.

قطع



انشراح: لسه جاي يا متولى!!.. ده اللي
ح أخلص وأجيلك هوا!!..
متولى: سيبيني يا انشراح فى حالي.. أنا
روحى فى مناخيرى.

يفتح الباب ويدخل محبطاً.
 انشراح مرتدية قميص النوم ونرى قزازات
البيرة ملقة فارغة فى كل ركن من البيت.

انشراح: ماله الرجال ده!!..

يدخل إلى حجرة النوم.

قطع



متولى نائماً وهو يتقلب في قلق وتوتر شديدين
وهو يسمع صوت كريم مصباح.

صر. كريم: 350 جنيه في الشهر.. 350
جنيه في الشهر.

انشراح: أنت بتكلم نفسك يا متولى..
ح تعدل ياله.. وح أخلفاك دستة القرود اللي
إنت عاوزهم.

متولى: أنا باقول نستنى شوية يا انشراح
عشان الأيام اللي داخلين عليها شكلها كده
ناشفة شوية.

انشراح تقترب منه في حنان وتركت عليه.

متولى يعطيها ظهره.

انشراح تضرره.. ثم تحاول تقبيله ثم قطع
على التليفزيون وبه النشرة التي تقول.. حضر
السيد الرئيس اليوم احتفال العيد الوطني.
متولى يدفعها بعيداً عنه.

قطع



متولى داخلاً إلى مطبخ الرئاسة من المدخل
الخلفي لبيت الرئيس.
الحرس يفتشونه.. ويدخل تحت جهاز وهو في
قمة الرعب.

قطع



مشهد : 62

نهار / داخلى

المطبخ

يدخل متولى وهو فى قمة الذعر.

يجد عم سليمان بانتظاره.. لا يزال عبوساً متضايقاً.

سليمان : إنت متأخر خمس دقائق.. المواجه
هنا عسكرية.. فيه انصباط.

متولى : معلش يا عم سليمان.. أنا ما نمتش طول الليل.. رجليا بتختبط فى بعضها ومش قادرة تشيلاني.

سليمان : شوف يابنى.. عشان تكمل هنا لازم كل حاجة تكون مطبوطة بالمللى.. نص جرام ملح يعني نص جرام ملح مش جرام إلا ربع.. مفيش بالبركة.. إنت فاهمنى طبعاً.. الوجبات المفضلة لسيادة الرئيس هي الوجبات المفضلة لأى مواطن عادى.. أنا حاستنى معاك كام يوم لحد ما تحفظ الشغلانة وتاخذ عليها.

متولى : أبوس إيدك ما تسيبني يا عم سليمان.
الله!!.. إنت بتعييط يا عم سليمان؟!

سليمان : لأن.. ما باعيطش ولا حاجة.. أصل الواحد لما بيسيب مكان أخذ عليه وعاش عمره فيه بتحز في نفسه.

متولى : طبعاً إنت وصلت في المرتب جامد يا عم سليمان.. ما إنت قديم هنا بأه؟

سليمان : الحمد لله المعاش كويس يقضى ويفيض.

سليمان يمسح دموعه بكيرياء.

متولى : وصلت كام يا عم سليمان؟.

سليمان : أنا مرتبى 480 جنيه.

متولى : بعد السنين دى كلها يا عم سليمان؟!.
ودول يعملوا إيه؟!.

سليمان : يعملوا لو إنت عاوز وحابب وراضى
ومبسوط يا متولى.. أنا بقالي 12 سنة مع
سيادة الرئيس.. عيالى كبروا واتجوزوا وخلفوا..
ومفيش مخلوق عرف إنى كنت طباخ الرئيس..
كنت باجى كل يوم يا متولى يابنى.. وأنا حاسس
إنى باعمل حاجة مهمة قوى.. أنا بأدلى عمل
وطنى.. ربنا يوفقك يابنى.

هاماً في رعب.

سليمان يُخرج منديلاً ويمسح دموعه.. ومتولى
فى قمة الإندهاش.

يدخل كريم مصباح.

كريم : متولى؟.

متولى : كريم باشا؟.

كريم : تعالى عشان ح تقابل السيد الرئيس.

متولى : دلوقتى؟!!!.

كريم : أيووه.

رد فعل على وجه متولى مفزوغاً.
مبتسماً.

متولى : طيب ما تأجلها شوية يا باشا..
ح أخش ع الرئيس بإيدى فاضية كده؟!.

قطع



الكوريدور المؤدى إلى حجرة السفرة التي يأكل فيها الرئيس أبواب مغلقة وبيودى جاردز يطلعون مما يزيد رعب وتوتر متولى.. وكريم مصباح معه.

قطع

مشهد : 64

نهار / خارجي

حديقة بمنزل الرئيس

الرئيس جالساً بجوار المائدة حيث مائدة حجرة بها تراييزة سفرة.. وأثاث عريق مهيب.

كريم وبجواره متولى يكاد يسقط من طوله.

بيتسـمـ.

بيـكـيـ من فرط الخوف.

كـريـمـ؛ متـولـىـ.. الطـبـاخـ الجـدـيدـ ياـ سـيـادـةـ الرـئـيسـ.

الـرـئـيسـ؛ إـزـيـكـ ياـ متـولـىـ؟ـ.

متـولـىـ؛ اللـهـ يـخـلـيـكـ ياـ رـئـيسـ.

الـرـئـيسـ؛ مـالـكـ؟ـ!

متـولـىـ؛ بـسـ.. أـصـلـ.. هـبـةـ سـعـادـتـكـ ياـ رـئـيسـ..ـ

يعـنـىـ

الـرـئـيسـ؛ إـنـتـ مـتـجـوزـ ياـ متـولـىـ؟ـ.

متـولـىـ؛ أـيـوـةـ يـافـندـمـ.

الـرـئـيسـ؛ وـعـنـدـكـ عـيـالـ؟ـ.

متـولـىـ؛ لـسـهـ ياـ رـئـيسـ.

كـريـمـ؛ أـصـلـهـ عـرـيـسـ جـدـيدـ يـافـندـمـ.

الـرـئـيسـ؛ طـيـبـ ماـ تـشـدـ حـيـلـكـ بـأـهـ.

متـولـىـ؛ نـخـفـ فـورـاـ يـافـندـمـ.

الـرـئـيسـ؛ حـ تـأـكـلـنـاـ إـيـهـ النـهـارـدـةـ؟ـ.

متـولـىـ؛ الجـدـولـ يـافـندـمـ.. النـهـارـدـةـ عـامـلـينـ..

الـرـئـيسـ؛ وـلـاـ جـدـولـ وـلـاـ حـاجـةـ.. أـنـاـ عـاـوـزـ شـوـيـةـ

شـورـبـةـ عـدـسـ.. اـتـفـضـلـ.

متـولـىـ يـمـشـيـ وـيـسـقـطـ عـلـىـ الـأـرـضـ منـ فـرـطـ

الـرـعـبـ ثـمـ يـقـومـ.. وـالـرـئـيسـ بـيـتسـمـ.

قطع





متولى : شورية عدس.. شوربة عدس بتعمل إزاي
يا رب.. ده.. ده أنا كنت بأعمل 26 نوع شوربة
عدس!!.

إحقن يا عم سليمان.. نسيت شوربة العدس
ياعم سليمان!!.

سليمان : فوق يا متولى.. فوق.. إجمد بأه
وتمالك أعصابك يابنى.. ما تخافش.. أنا حصل
لى كده أول يوم اشتغلت فيه مع سيادة الرئيس..
يابنى الرئيس بيشرب شوربة عدس ذى أى شوربة
عدس عادية جداً.. قوم يا متولى.. ح تعمل شوربة
العدس وح تقدمها بإيدك لسيادة الرئيس.. قوم..
أشمعنى لما بتقف على العربية فى الشارع بتعمل
البدع.. إنت ما تعرفش تطبخ غير الرصيف؟!.

متولى : يا عم سليمان أنا لما كنت باطبخ للشعب
ما كانش بيهمنى.. إنما لما بأيت بطبخ لسيادة
الرئيس.. خايف أغلط.. أزود ملح.. أزود فلفل..
شوية كزبرة بيجهوا غلط أروح فى ستين داهية.
سليمان : اسلق العدس.. افركه.. صفيه..

افرك الجزر.

متولى يخطر رأسه.
متولى يلطم على وجهه.
يرى عم سليمان.

يسقط من طوله.. عم سليمان يضربه ويفيقه.

يبدأ سليمان في توجيهات كيفية عمل شوربة
العدس لمتولى الذي يُنفذ ما قاله له وكأنه
يتحرك بالريموت مع موسيقى وطنية حماسية.

قطع



متولى يحمل سرفيس الشوربة وهو يرتعش
للسيد الرئيس.. ويضعه أمامه.. ويتسمى في
مكانه.. ثم يغادر.

الرئيس : استنى تعالى هنا.
الرئيس : يتذوق الشوربة.

كلوز لمتولى وهو في قمة الربع.

BC : الرئيس بيتسم.

BC : متولى بيتسم.

فجأة.. تجمد ملامح الرئيس.

متولى يُصاب بهلع.

مداعبًا.

الرئيس : امسك دول يا متولى.

متولى : ربنا يخليلك يا سيادة الرئيس.

الرئيس : دول 42 جنيه.

متولى : بتوع إيه ياريس.

الرئيس : أنت بتشفو عم شحاته يا متولى..

أخباره إيه دلوقت!.

متولى يكاد يفقد النطق.

متولى : هو.. سعادتك.. أصل.. يا نهار أسود..

أنا ماقصدتش ياريس!.

يلطم على وجهه ويسقط مغشياً عليه.
الرئيس يضحك أثناء اللطم.

قطع

متولى... أنت طباخ
الرئيس ..





حازم: إنت كنت واقف بتعمل إيه قدام سيادة الرئيس؟.

يدخل حازم حسين.

متولى: أصل يا حازم بيه..

حازم: تحط الأكل وتمشى على طول.. إنت ح تقف تتفرج على سعادة الرئيس وهو بياكل.. هو عم سليمان ما لقنيكش.

متولى: حاضر يا باشا.

قطع



متولى الطباخ يضع الطعام أمام الرئيس في
أوقات مختلفة وأزمنة مختلفة مما يعبر عن
مرور وقت وتوطد العلاقة.

دون أن يبدو أى حديث بين الرئيس ومتولى..
يضع الطعام ويجرى من أمامه دون أن ينظر
إليه مجرد نظرة طبقاً لتعليمات حازم.. الرئيس
مندهشاً.

وفي نفس الوقت يتعامل على عربة الأكل مساءً
مع الشعب بطريقة مختلفة تماماً.

قطع



انشراح : إيه دول؟.

متولى : مصروف الشهر يا انشراح.

انشراح : إنت بتودى فلوسك فين يا متولى؟.

شهر طويل عريض.. ما تطلاعش فيه غير بالكام
ملطوش دول.. ليه الناس بطلت تاكل.

متولى : لا.. الناس بتاكل.. بس زى ما تقولى
الزباين خفت شوية.

آلو.. أيوة يا باشا.. بكرة.. بصارة يا باشا..
حاضر يا باشا.. من غير تقلية.. حاضر
يا باشا.. أوامر يا باشا.

انشراح : ومين يا خويا اللي بيطلب منك
بصارة فى نص الليل يا متولى؟.

متولى : زبون.. زبون يا انشراح.

انشراح : وزبون إيه ده اللي يصحيك فى نص
الليل يا متولى؟.

متولى : ويصحينى فى الفجر كمان
يا انشراح.. عشان ده أحسن منك ومن اللي
خلفوكى وهلفطى بأه فى الكلام عشان ليلتكم
دى شكلها مش معدى على خير.

انشراح.. هى البصارة بتتعمل إزاي
يا انشراح؟.

متولى يعطى انشراح مصروف الشهر.

ينتفض.

يضع السماuga.

يصرخ فيها.

لحظة صمت.. ثم متولى يخطب على رأسه بيده.

قطع



مرشح يتكلم عن وعود براقة بالارتقاء بمستوى المعلم.

النقيب: وأنا وعدتكم بالنهوض بمستوى الطالب والمدرس في خلال الفترة التي فاتت وماحدش ينكر إن إحنا حققنا إنجازات لا تُنكر وأوعدكم الفترة القادمة بمزيد من الإنجازات.

تتدخل اشراح وتقود هى الثورة والهتافات.

اشراح: شبعنا بأأه كلام.. وووعد.. ما بتتحققش.. النقابة بتعمل إيه للمدرسين.. مرتب المدرس ما يكفيهوش عيش حاف.. وزعلانين إنهم بيدوا دروس خصوصية.. البلد لا يمكن تقدم طول ما التعليم بالصورة دى.. وطول ما التعليم فاشل.. بياه النظام كله فاشل.. يسقط نقيب المعلمين.. يسقط نقيب المعلمين.

تصفيق حاد.

يرددون وراءها.. يتدخل الأمن لفض المشاجرة.. أحد الرجال يقترب منها.

الرجل: أبله اشراح.. إحنا مستينك بالليل في مقر الحزب.

اشراح: حزب إيه؟!!.

الرجل: حزب المعارضة.. لازم نشوف حل في اللي بيحصل ده.

قطع



لقطة عامة من الخارج ومنظر عام لحزب
المعارضة مكتوبًا عليه.. (حزب المعارضة)
قطع



انشراح: الموضوع ده لا يمكن ينسكت عليه..
وأحنا لازم نصعد الموضوع لأعلى مستوى
إِنْشَاءُ اللَّهِ نرْوُحُ لِلرَّئِسِ.

الرجل: وح نوصل له إزاى؟!
انشراح: نفتصم كلنا في مقر النقابة لحد
ما ييجوا يتكلموا معانا ويعرفوا مطالبنا.

رجل: النقيب لازم يتغير.

انشراح: الحكاية مش تغيير أشخاص.

إحنا لازم تنظم مسيرة.. نعبر فيها عن
مطلوبنا.. إحنا مش عاوزين غير حقوقنا..
حقنا إن إحنا نعيش وناكل ونشرب.. ونعلم
ولادنا صح.

قطع



الرئيس: إحنا فى عصر الحريات.. مصر بتعيش مرحلة غير مسبوقة من الديمقراطية.. يمكن ح تقرروا فى الجرائد هجوماً أو نقداً جارحاً علينا شخصياً.. بس أنا باشتغل وبس.

بصله: ما شاء الله.. الرئيس كلامه حلو قوى النهاردة.. ربنا يديله الصحة.. ما هي الشيلة تقيلة.. وشه مورد.. تلاقيه بيأكل إيه ده يا أسطى.. تلاقيه بيفطر ع الصبح 4 كيلو جمبرى.

متولى: جمبرى إيه.. دول هما شوية شوربة خضار.. شوربة عدس.. بصارة.. آدى أكلته.

بصله: هوه إنت ح تفتى فى أكل الرئيس كمان.

متولى: إنت كنت فين يا انشراح ده كله؟!

انشراح: كنت فى الحزب.

متولى: حزب إيه يا ماما؟!

انشراح: حزب المعارضة.

متولى: نعم ياختى؟! طب إطلعى.. إطلعى قدامى.. امشى.

متولى جالساً على المقهى.. بصله.

التليفزيون يعرض خطاب الرئيس فى المجلس.

بتلقائية.

متولى ينظر نحوه فى غيظ.

تأتى اشرح.

يدفعها ويطلع إلى البيت.

قطع



مشهد: 74

لیل / داخلى

بیت انشراح

متولى: انضمي لحزب المعارضة يا انشراح!!.. أحزاب البلد كلها قدامك وبينشوا.. ما لقيتيش غير حزب المعارضة يا انشراح؟!!.

انشراح: إنت خايف من إيه؟!!؟؟. إنت جبان
كده لسه؟!؟!

هتوئى؛ ما هو ما ينفعش.. تبأى إنت فى حزب
المعارضة وأنا...

انشراح: انت ایهه!!.

هتولى: أنا.. أنا عاوز أكل عيش يا انشراح..
حلى عنى بأه أنا مش ناقصك.

انشراح.. وإنْت عاجبک العيشة اللي إحنا
عايشينها دى؟؟؟.. إنْت على باب الله ومتش لاقى
تاكل.. وأنا طول الشهر بيقطع نفسى عشان
120 جنيه.. ولا عارفين نلاقى أوضة وصالحة
نعيش فيهم.. تباءه دى حياة يا متولى؟؟؟.. مين

السبب فى الذى إحنا فيه ده.. متن الحكومة.

انشـاح: الـبسـ لـازـمـ بـعـفـ النـاسـ عـاـشـةـ اـذـاءـ.

متولی یاطم علی وجهه.

متولی یضم یده علی فمهای.

صلاح خارجاً بالملابس الداخلية من حجرة النوم.. إلى الحمام وفي يده فوطة.

قطع



آدى المعارضة.. كفاية.. كفاية يا عم صلاح.
انشراح فى مظاهره..
وھى تهتف وتحمل لافتة مكتوب عليها.
”التغيير.. التغيير“

قطع



الرئيس: من حق كل واحد إنه يتظاهر ويختلف مع النظام.. إنما بدون تخريب.

حازم: إحنا احتوينا الموقف تماماً يا سيادة الرئيس.

الرئيس: أنا لازم أشوف الولاد دول.. ولازم أسمعهم بمنفسي.. أنا حاً روح النقابة وأتكلم معاهم.

كريم: تمام يا سيادة الرئيس.. ده قرار سليم جداً.

حازم: يافندم المسألة ما تستاهلش.. الموضوع خلص خلاص.. وبعدين أنا شايف إن سيادتك تأجل الزيارة دي لحد ما الأمور تهدى شوية.

الرئيس: وأأجلها ليه يا حازم؟!

حازم: لداوعى أمنية يافندم.

الرئيس يتمشى في الحديقة ومعه حازم وكريم.

الرئيس: تعالى يا متولى إيه رأيك في المظاهرات اللي حصلت في البلد يا متولى؟!

متولى: دول ناس يا باشا عاوزين يخربوها.. عاوزين قطم رقبتهم.

الرئيس: انشراح مراتك إزيه؟!

متولى: اطلقت يا باشا.

رد فعل على وجه الرئيس وهو في قمة الضيق.. حتى يصل إلى حجرة السفرة.

يدخل متولى ويضع الطعام.

الرئيس ينظر نحوه نظرة طويلة.
ترتعد فرائص متولى.

قطع

مشهد : 77

نهار / خارجي

المظاهرة

الأمن يحاولون احتواء المظاهرة.. مشاجرة..
ثم القبض على انسراح

قطع





متولى : بالهنا والشفا يا رئيس.

الرئيس : مالك يا متولى .. شكلك مش مبسوط؟!.

متولى : شوية مشاكل في البيت يا رئيس.

الرئيس : رد متولى.

متولى : آلو .. نعم .. قسم إيه؟!! . إيه اللي حصل يا انسراح؟!!.

الرئيس : خير يا متولى .. مراتك مالها؟!.

متولى : المدام اتقبض عليها يا رئيس .. كانت ماشية في المظاهرات والحمد لله خدت جزاءها.

متولى يرفع الطعام.

يرن موبايل متولى الذي يضعه جانباً .
وهو ينظر للموبايل.

قطع

مشهد : 79

ليل / خارجي

أمام القسم

متولى : عاجبك البهدلة دى .. أسيب شغل
وآجي عشان أطلعك .. إنت مالك بالمظاهرات
يا اشرح؟!

انشرح : لعلك بآه أنا لا يمكن أسكط ومش
ح أرجع عن موقفى .. وهما إزاي يطلعونى
ويسيبوا بقية الزُّملاء فى الحجز ..
وإنت طلعتنى إزاي يا متولى إنت تعرف مين؟!
إنت تصرفاتك مُرببة اليومين دول .. وكنت فين
لما كلمتك؟!

متولى : إنت طالعة م الحجز تتحققى معايا
أنا؟!!

متولى خارجاً من القسم ومعه انشرح.

تظر له بشك.

قطع



الرئيس: هو أول الجواز كده يابنى.. لازم
شوية خلافات ومشاكل لغاية ما تتطبعوا على
بعض.. إنما بالصبر كل حاجة بتعدى.. شعبنا
أكثر شعب صبور في العالم كله.

متولى: ربنا يخليلك لينا يا رئيس.
الرئيس: ح تأكلنى إيه النهاردة بأه؟

متولى: نفسى يا رئيس...

الرئيس: مالك.. إنت واقف قدام رئيس
الجمهورية.. قول اللي فى نفسك ما تخافش
من أى حد.

متولى: نفسى أكل سعادتك على مزاجي.
الرئيس: ياللا.. أنا موافق.

متولى: بس يا رئيس.. الموضوع ده بيننا
عشان ما أتأذيش.

الرئيس: ح تأكلنى إيه؟
متولى: طبق كشرى بالدقة والتقلية.. حكاية.

الرئيس: واللهى أنا نفسى رايحاله.. بس شوية
صغرىين عشان القولون.

متولى: حاضر يافتدم.

الرئيس يضحك.

ينظر حوله في خوف.

يهمس للرئيس في خوف.

الرئيس يضحك.

في ثقة.

قطع



ديزولف.

الرئيس: واحد كمالة يا متولى.
متولى: ربنا يديلك الصحة يا رئيس.
الرئيس: تعرف يا متولى.. أحلى أكل فى الدنيا
أكل الشعب المصرى.. أنا عمرى ما انبسطت
من أكل أى دولة فى أوروبا ولا فى أمريكا..
عقارية شعبنا إنه يقدر يعمل من الحاجات
البسقطة دى أشياء رائعة...
متولى.. هو طبق الكشرى بيتباع بكم
النهاردة؟.

متولى: لسعادتك ولا لأى حد؟.

الرئيس: لسعادتى إزاي.. تمنه كام الطبق؟.
متولى: 3 جنيه يا رئيس.. إنما لو عاوز عدس
زيادة.. شوية ورد.. تقلية زيادة.. حمص..
ممكن يوصل خمساية.

صارخاً.
مرعوباً.

متولى: هو أنا اللي مسخره يا رئيس؟!!.
الرئيس: يعني لو أسرة بسيطة من خمسة
أفراد عاوزين يتغدوا كشرى يدفعوا 25 جنيه..
ده أنا قايلينى الطبق بنص جنيه.

متولى: نص جنيه إزاي بس يا رئيس.. ده
نفس الكلام اللي كانوا قايلينه للملك فاروق..
الحاجة ولعت يا رئيس.

الرئيس: طيب اتفضل إنت يا متولى.

الرئيس مستاء للغاية.

قطع

واحد ماله
يامتو لى ..





مشهد : 82

نهار / خارجي

وزارة التموين

لقطة من الخارج لوزارة التموين.
الصوت: أية يا كريم بيه.. أؤمر يافندم.
نسمع صوت.

قطع



مشهد : 83

نهار / داخلي

مكتب وزارة التموين

الكاميرا تتحرك زووم على شاريته نحو المكتب
حتى تصل إلى مكتب الوزير.

الوزير: سيادة الرئيس.. حالاً يافندم..
سعادتك ما تعرفش بخصوص إيه.. حالاً
يافندم.

الوزير يغادر مسرعاً.. والحرس وراءه.. ويمشي
في الكورidor.

قطع



الرئيس جالساً على مكتبه.. يدخل وزير التموين
مرعوباً.

يشير بقبضته يده.

الوزير: صباح الخير يا فندم.
الرئيس: صباح الخير.. اتفضل..
كبشة مكرونة قد كده.. على شوية رز قد كده
ومعلقتين عدس بجية فوقينهم على شوية تقلية..
دول يعملوا كام.

الوزير: أنا مش فاهم سيادتك تقصد إيه.
الرئيس: طبق الكشرى بкам يا سيادة الوزير؟
الوزير: بنص جنيه يا رئيس.

الرئيس: إنت بقالك قد إيه ما أكلتش كشرى
يا معالى الوزير.. ولا إنت غرمان فى الكافيار
والسيمون فيمي.

الوزير: يافندم كل دى إشاعات مُفترضة
ومحاولات لتشويه صورة الوزارة قدام سعادتك..
طبق الكشرى عند أى محل مُسعر بنص جنيه..
إحنا مراقبين الأسعار كويس.. أنا نفسى لسه واكل
عند أبو طارق أول إمبارح.. الطبق بنص جنيه.


الرئيس: عند أبو طارق؟.
الوزير: زى ما باقول لسعادتك.

الرئيس: حاضر.
أطلبلى أبو طارق يابنى..
مش أبو مازن.. أبو طارق بتاع الكشرى.

يدوس على الجرس.

رد فعل على وجه الوزير.

قطع



حازم: إحنا لازم نعرف مين مصدر المعلومة دى؟! الخبر ده المقصود بيه البلبلة وإثارة الرأي العام.

كريم: مش مهم مين مصدر المعلومة يا حازم بيـه.. المهم هية صحيحة ولا لاـ؟!
حازم: هو الرئيس اتفدى إيه إمبارح؟!

قطع



متولى: كشري يا فندم.
حازم: إنت قلت لسيادة الرئيس إن طبق الكشري بخمسة جنيهـ؟!

متولى: سألنى يا حازم بيـه لازم أقول لهـ.
حازم: وانت تقول له بصفتك إيهـ؟! إنت عملتنا أزمة فى البلد كلهاـ.

متولى: يا بيـه ما الناس كلها عارفةـ.
حازم: ده آخر إنذار ليك يا متولى.. بعد كده حسابى معاك ح يكون عسـيرـ.

قطع

حازم حسين فى المطبخ



مشهد: 87

نهار / خارجي

مائدة الرئيس

متولى يضع الطعام.

الرئيس: إيه مالك مبوز كده ليه؟!

متولى: مفيش حاجة يا سيادة الرئيس.

الرئيس: مش عاوز تأكلنى على مزاجك
النهاردة ولا إيه؟!.

متولى: لا يا سيادة الرئيس اللي سعادتك تقول
عليه أعمله يا فندم.

الرئيس: العيش ده انتوا خابزينه هنا
يا متولى؟.

متولى: آه والنعمة الشريفة يا سيادة الرئيس..
دقيق نمرة واحد.. قمح أمريكي ورده.. وخميرة
طاليانى... و.....

الرئيس: أنا عاوز أكل عيش من اللي كل الناس
بتأكله.

الرئيس يتأمل أرغفة الخبز.

متولى: بعد الشر على سعادتك يا رئيس.

الرئيس: نفذ اللي باقولك عليه.. بكرة تجيب
لى رغيف من فرن بلدى.. رغيف مدعم.

قطع

مشهد : 88

نهار / خارجي

أمام فرن بلدي

طوابير رهيبة ومشاجرات ومتولى يكاد
يفعصونه وهو يرفع يده بالفلوس.

متولى : خمس ترغفة يا عم .. أبوس إيدك عندنا
شغل .. لسه رايحين آخر الدنيا .. نقىهم كويس ..
انتوا مش عارفين دول رايحين لمين؟!

يأخذ العيش بصعوبة بعد أن خلعوا قميصه
ويعود ليسحب القميص.



مشهد : 89

نهار / خارجي

مائدة الرئيس

الرئيس : إيه اللي آخرك؟.

متولى : ساعة ونص يا رئيس.. الكوبرى كان واقف خالص.

الرئيس : ما أنا جاي الصبح من المجلس.. والكوبرى كان فاض؟.

متولى : ما هو إحنا اللي كنا واقفين تحت الكوبرى يا رئيس.

الرئيس : جبت العيش؟.

متولى يخرج رغيف العيش ويضعه أمام الرئيس.

إيه ده؟؟؟ زلط؟؟؟.

الرئيس يفتح رغيف العيش فيجد به زلط.

متولى : ما فيش حاجة يا رئيس.. ده زلط صغير سعادتك ما يعملش حاجة.

الرئيس : وعيadan كبريت ومسامير؟؟؟.

متولى : بس للأمانة سعادتك الرغيف بشلن.. يعني في متناول المواطن محدود الدخل يا رئيس.

يخرج عيدان كبريت.

الرئيس يضع الرغيف جانباً وينظر إلى الأمام في ضيق وهو يزفر في أسى.

قطع

مشهد : 90

نهار / داخلي

مكتب كريم

كريم : خبر إقالة وزير التموين لاقى ردود أفعال
كويسة قوى فى الشارع.. الناس مبسوتة قوى.

حازم : كريم بيـه.. أنا شايف إن إحنا نشوف
طبـاخ تانى لسيادة الرئيس غير متولى و..

كـريم : ليـه يا حازـم بيـه؟؟؟.

حازـم : الـولد دـه أنا قـلت من الأول لـسانـه طـوـيل..
وبيـتكلـم كـتـير.

كـريم : يا حازـم بيـه.. سـيـادـة الرـئـيس عـارـف
بيـعمل إـيه كـويـس.

حازـم : سـيـادـة الرـئـيس عنـده مشـاغـل كـبـيرـة جـداً..
عـلاـقات خـارـجـية وـسـيـاسـات عـامـة سـعادـة بـيـحطـها
وـإـحـنا عـلـيـنـا إنـإـحـنا نـقـذـهـا.. لـمـا نـدـخـل سـيـادـة الرـئـيس
فـى كـلـ كـبـيرـة وـصـغـيرـة نـبـأ بـنـرـهـقـهـ أـكـثـرـ منـالـازـمـ.

كـريم : أنا أـخـتـلـفـ معـ سـيـادـتكـ ياـ حـازـمـ بيـهـ.. لأنـ
سـيـادـة الرـئـيسـ مشـغـولـ فـىـ المـقـامـ الأولـ.. بـمـحـدـودـىـ
الـدـخـلـ.. وـالـنـاسـ هـمـ أـهـمـ حاجـةـ بـتـشـغلـ سـيـادـتـهـ.

حازـم : يا كـريمـ بيـهـ.. فيهـ كـلامـ فـىـ الـوزـارـةـ إنـ
الـولـدـ دـهـ بـيـنـقلـ صـورـةـ غـلـطـ لـسـيـادـةـ الرـئـيسـ عنـ
أـدـاءـ الـوزـارـاتـ وـإـنـ الـكـلامـ الـلىـ قـالـهـ لـسـيـادـةـ الرـئـيسـ

كانـ السـبـبـ الرـئـيـسـىـ فـىـ إـقـالـةـ وزـيرـ التـموـينـ.

كـريمـ : الرـئـيسـ ماـ اـتـخـذـشـ القرـارـ دـهـ.. إـلـاـ لـماـ
تـأـكـدـ بـنـفـسـهـ وـالـجهـاتـ الرـقـابـيـةـ أـكـدـتـ لـهـ كـلـ
الـحـيـثـيـاتـ الـلـىـ خـلـتـهـ يـتـخـذـ قـرـارـهـ.

كـريمـ مـصـبـاحـ يـتـصـفحـ الـجـرـيـدةـ.. وـنـرـىـ مـاـ نـشـيـتـ
رـئـيـسـ.. إـقـالـةـ وزـيرـ التـموـينـ.

يـدـخـلـ سـكـرـتـيرـهـ وـيـضـعـ أـمـامـهـ مـلـفـ.. وـيـخـرـجـ..
وـيـدـخـلـ حـازـمـ حـسـينـ.

قطع



الرئيس : أنا الحقيقة حبيت إن إحنا نتفدوا مع بعض النهاردة ويكون لقائى ييكم لقاء ودى.. بعيد عن الرسميات.. وعشان بيأه عيش وملح برضه.

وزير : دائمًا عامر يا سيادة الرئيس.

الرئيس : العيش اللي نازل لحضراتكم ده.. عيش بلدى مدعم.. جاي من فرن بلدى فى الحوامدية.. والفول ده من عربية من عند واحد اسمه.. إسمه إيه يا متولى؟.

متولى : إسمه كباكا يا ريس.. كباكا بتاع الفول.

الرئيس : ما إحنا لازم ناكل من اللي شعبنا بيأكله.. جايز تلاقو فى الأكل مسامير.. زلط.. عيدان كبريت.. بس زى الشعب ما بيستحملنا وبيحبنا وبيبلغ لنا الزلط إحنا كمان لازم نحبه ونبلغ له الزلط.. أنا عاوز الأكل ده يتمسح فوراً.. اتفضلو.

الرئيس والوزراء.. ومتولى يضع الطعام.

الوزراء يبدأون فى الأكل وهم فى قمة الضيق.. وزير يكسر زلطة وهو يأكل.. ووزير آخر يخرج مسماراً من فمه.. وزير التعليم يزور.. متولى يخطبه على ظهره.. ويعطيه الماء من شفشق مية.

وزير التعليم : متشرك.. متشرك قوى.

قطع



مشهد : 92

ليل / داخلي

بيت انشراح

انشراح: ما هو إنت ترسينى بأه يا متولى.. أنا متوجزة راجل والا متوجزة قفص جوافه.

متولى: عيب يا انشراح.. أنا قصدى يعني يمكن الناظر ما كانش يقصد وانت فهمتى غلط.

انشراح: ما كانش يقصد إيه؟! بقولك حاول بيوسنى متولى: حاول بيوسك.. وانت سكتيله؟!

انشراح: بقولك ضربته.. ضربته.. إيه إنت ما بتفهمش؟!

متولى: خلاص يا انشراح.. حاول بيوسك وانت ضربتى.. يعني أخذ جزءاه.

انشراح: ده محولنى للتحقيق وعاوز يرفدنى.
متولى: عشان ما رضيتيش تبوسيه.

انشراح: وهو ح يقول يعني فى التحقيق إنه حاول بيوسنى.. ح يتبللا عليا بأى حاجه.. اسمع.. إنت لو ماروحتلوش بكره وعرفته مقامه.. تطلقنى

متولى: خلاص.. إنت ما تروحيش المدرسة
بكرة وأنا ح أعدى عليه أهزأه.. ما تفكيرها بقى..
دول أهلك أول يوم يتخدمو بدرى.

انشراح: أوعى كده.. أهو إنت مفيش فى دماغك غير قلة الأدب.

متولى: ما تجيبي بوسة طيب.

انشراح: احترم نفسك يا متولى.

متولى: يا بت.. ده أنا جوزك.. هو أنا الناظر!.

انشراح: طيب اطفى النور.

قطع

مشهد : 93

نهار / داخلي

مكتب الناظر

عبد الفضيل جالساً فى ضيق وقد تورمت عيناه.. الفراش يدخل.
الفراش : واحد عاوز يقابل سعادتك يا حضرة الناظر.

الناظر : مين يا ترى.

الفراش : واحد اسمه متولى.

الناظر : خلية يدخل.

نعم.. خير.. عاوز إيه؟!.

متولى : أنا سعادتك أباه جوز أبلة انشراح مدرسة الألعاب اللي حضرتك كنت عايزة تبوسها.

يدخل متولى.

الناظر : انت جاي تعمل إيه هنا.. مراتك متحولة للشئون القانونية.

متولى : يا أستاذ عبد الفضيل بس اسمعني.

الناظر : افضل من هنا يا أستاذ.. يا قرنى..
طلعوا الرجل ده بره!

متولى : يا أستاذ عبد الفضيل أنا ماسك نفسى ومش عاوز أتهور عليك.

الناظر : إنت بتهددى فى مكتبى.. ودينى لأكلم البوليس.. أنا ح أسجنك إنت ومراتك..

عاملين عصابة عليا.. وإنت إيه.. بطجي.

امسکوا الجدع ده وبلغوا البوليس.

مدرس : يا أستاذ عبد الفضيل.. وزير التعليم بيمر.. فى زيارة مفاجئة للمدرسة.

يدخل الفراش ومعه بعض المدرسين.

يقوم مسرعاً ويجرى خارج المكتب وخلفه الجميع ومتولى.

الناظر : معالي الوزير فى المدرسة.

قطع



مشهد : 94

نهار / خارجي

فناه المدرسة

وزير التعليم ينظر إلى المدرسة وخلفه الحرس والأطفال في صفوف واقفين ويغنوون له أغنية للترحيب بمعالى الوزير.. الوزير يرى متولى.. يترك الجميع.. ويدهب إليه فاتحًا ذراعيه.

و. التعليم : معقوله.. متولى.. بتعمل إيه هنا؟!
متولى : حبيب قلبي.. معاليك واحشنى قوى.
و. التعليم : بس يا راجل يا أونطجى.. إنت مش قايل لى إنك ح تعددى عليا فى الوزارة.
متولى : مشاغل يا معالى الوزير.. معاليك عارف.
الوزير : أنا مقدر طبعاً.

الناظر ينظر إلى الموقف في ذهول وقد فقد النطق.
هاماً للناظر.

متولى : ما تكلم البوليس يا عبد الفضيل
خلיהם ييجوا.
ع. الفضيل : أستاذ متولى.. اللي ما يعرفك
يجهلك.. تسمح لي أبوس راسك.
متولى : ح بياه أنا ومراتي يا عبد الفضيل..!

قطع



الناظر: وقد قررت إدارة المدرسة إعطاء السيدة انشراح مدرسة الألعاب جائزة المدرسة المثالية على مستوى المحافظة ونقلها من مدرسة ألعاب رياضية في المرحلة الابتدائية إلى مدرسة أولى رياضيات بالمرحلة الثانوية

الناظر مجتمعاً بالمدرسين في المدرسة.

تصفيق المدرسين وانشراح سعيدة للغاية.
قطع



مشهد: 96

لیل / داخلى

بیت انشراح

انشرح ومتولى.
افشراح: ما هو أنا عاوزة أفهم بأه.. إنت
إيه حكايتك بالظبط يا متولى.. إنت طلعتنى
من القسم بمنتهى السهولة ، وبعدين رجعتنى
المدرسة والناظر رقانى واتلغفت الشكوى
فى الشئون القانونية.. إنت مين يا متولى؟.
فهمنى.. إنت مين؟!

متولى : ح أكون مين يعني يا انشراح.. حته
طباخ.. لا راح ولا جهـا.


الشرح: بأة وزير التعليم بنفسه أول ما يشوفك يجري عليك ويأخذك بالحضن.

هتولى : ما هو أكل من إيدى مرة زمان واتكيف
من الأكل .. وشابل لى الجميل.

الشرح: طب ده وزير التعليم وفهمناه..
طلعتني من القسم ازاي؟!.

متولٌ: ما هو وزن الداخلية كان ساكا معاها...؟

قطط





الرئيس يضحك.

وأمامه طبق من الترمس والحمص الشام

الرئيس: حلوه.. وايه تانى.. أنا عاوز أعرف كل النكت اللي بتقال يا متولى.

متولى: كلها ما ينفعش يا رئيس.

الرئيس: النكت يا متولى من الحاجات اللي بتميزنا.. بتخلى الإنسان يغسل همومه.

متولى: هو فيه حاجه كده يا رئيس هي مش نكته.. هو موقف كده حصل بجد أنا كنت لما شغال ع العربية كنت متعود أبعث للحى حلة كوارع كل يوم الصبح.. وبتوع الكهربا حلة ملوخية بالأرانب.. فمره الواد بصله اللي شغال معايا.. غلط بعت حلة الحى لبتوع الكهربا وحلة الكهربا لبتوع الحى.. راحوا بتوع الكهربا قاطعين الكهربا والحى جه شال العربية.

متولى: أنا الظاهر عكيت يا سيادة الرئيس..
بايخه مش كده.

الرئيس: فعلاً هي بايخه قوى!.

متولى يضحك ولكن الرئيس لا يضحك.. متولى بيلع ريقه فى خوف.

قطع

مشهد : 98

نهار / داخلي

مكتب كريم

كريم يمسك بالجريدة وماشيت الرئيس يشن حملة لتطهير المحليات فى البلاد من الفساد لا للرشوة.. لا للمحسوبية.. لا للقهر.

كريم: الله عليك يا سيادة الرئيس.. البلد بتتضضف صحيح.. أيوه كده.. الفساد بأه للركب.

حازم ينظر لذلك بضيق شديد.

قطع



متولى راكباً ميكروباص.. يقف أمام لجنة
يبحث في جيبه.

الظابط: إنزل ياد إنت وهو هنا.. بطاقتك
يالله!

متولى: نسيتها يا باشا.

الظابط: إنت شغال إيه يالله.

متولى: على باب الله يا باشا.

الظابط: قول حاحا.

متولى: أنا يا باشا.

الظابط: أمال أمري.. قول يالله.. خد الواد ده
ع البوكس

متولى: يا باشا.. أنا ما عملتش حاجه..
وأخدبني على فين؟!

الظابط: مشتبه فيك يا خويا.

لا يستطيع الرد.

يدفعونه للبوكس.

قطع

مشهد : 100

ليل / داخلى

القسم

متولى : يا إخواننا.. أنا مقدرش أبات هنا..
عندى شغل الصبح.
الضابط : أحجز لك فى أوتيل يا حبيبي..
روقوه فى الحجز.

ينهال عليه بالقفا.

قطع

مشهد : 101

ليل / داخلى

السجن

يلقون متولى داخل السجن بين المجرمين وهو
فى قمة الألم.. المساجين يقومون وقد قرروا
متولى : نهدا شويه يا إخواننا.. ده إحنا كلنا
فى الحجز مع بعض.
 مجرم 1 : قول أنا عيشه ياله.

أن يضربوه

مجرم 2 : أوعى تقول.
متولى : ما أنا لو ما قولتش ح يضربونى.


يهمس له.


مجرم 3 : ولو قلت.....
متولى : أنا مش عيشه يا ولاد الكلب.
يصرخ.

يهمس له.

ينهالون عليه ضرباً.

قطع





كريم: وإزاي ما تكلمنيش.. إزاي ما تتصلاش
بيا.

متولى: أنا لحقت أتكلم يا باشا.
حازم: إيه اللي حصل له التواد ده!

كريم: اتمسك تحري إمبارح.
حازم: ما هو شكله وشن سجون ومسكون ليه
ياله.

متولى: ما كانش معايا بطاقة يا باشا.
حازم: تستاهل.. اسمع.. أوعى تجيب سيرة
لسيادة الرئيس عن اللي حصل أحسن لك..
مش عايزين نضايقه على الصبح.. أنا بقولك
أهوه!

متولى يثبت بلاستر على عينيه.

حازم يدخل.

قطع

مشهد : 103

نهار / خارجي

الحديقة

متولى واقفاً أمام الرئيس.
لا يعرف ماذا يقول.

الرئيس : ما هى دى لا يمكن تكون وقعة.. مين
اللى ضربك يا متولى.

متولى : يا رئيس أنا.. أنا.

الرئيس : مش عايز كدب.

متولى : خدونى تحرى يا رئيس.. اشتبهوا فيا.

الرئيس : أنا عاوزك تحكىلى اللي حصل بالظبط.

متولى : أول ما مسكنونى ركبونى عربية البوكس
مكيفه يا رئيس.. ودخلنا القسم قدمولنا مشروب
الضيافة عصير فراولة يا رئيس.. وبعددين فيه فوط
سخنة كده فيها كولونيا بأوا يدوهالنا واحد واحد.

الرئيس : وسمعوك مزيكا فى القسم يا متولى.

متولى : مزيكا.. آه.. بس شعبيه شوية.

الرئيس : انت كداب وتساهم اللي جرالك.

متولى : ما هم قالولى ما اتكلمش يا رئيس..
هما اللي قالولى ما اتكلمش.

الرئيس : تعالى يا متولى.

الرئيس : تعرف يا متولى.. ورا سور ده شعب
كبير قوى.. حضارة وتاريخ.. 75 مليون نسمة
وأنا اللي مسئول عنهم كلهم.. مسئول عن
أكلهم وشربهم وثقافتهم وسعادتهم.

الرئيس ينظر نحوه في غيظ.

متولى ينفجر في البكاء.. ثم.. وهو يهدى من
فرط انفعاله.

الرئيس ينظر نحوه بتعاطف شديد.. ثم يربت
على كتفه بحنان دافق.

الرئيس يأخذ متولى ويمشى به بجوار السور.
متولى مع الرئيس في الحديقة يكلمه.

متولى : ربنا يكون في عون سيادتك يا رئيس.
الرئيس : متولى .. أنا عاوز كل واحد من الشعب
يحط نفسه مكانى .. تخيل انت نفسك يا متولى
إنك بأيت رئيس جمهورية لمدة عشر ثوانى
بس .. ح تعمل إيه؟!.

متولى : أنا يا رئيس.
الرئيس : أيوه .. انت رئيس جمهورية يا متولى.
المدة خلصت يا متولى ..!
انت لسه واقف؟!.

متولى ينظر نحوه وقد فقد النطق.

متولى يهم بالكلام.

متولى يجري مهرولاً إلى المطبخ.

قطع





متولى: معلش قهوة تعبانة شوية مش قد
المقام.. افضل يا رئيس.

الرئيس: بلاش كلمة يا رئيس دى هنا خالص.
متولى: حاضر يا باشا..

سلامو عليكوا يا رجاله.. تشرب إيه يا باشا؟.
الرئيس: أنا حاخد قهوة.

متولى: واحد قهوة هنا للباشا.. على مية
معدنية.

الرئيس: لا.. مية من الخفية.

صلاح: ما كفاية بأه.. شبعنا كلام.. هما
مفيش غير الكلمتين دول.

متولى: الله يخرب بيتك يا عم صلاح..
ما تقفل بقك ده.

صلاح: الخمس عيال اللي عندي أكلهم
منين.. وعمال يقول محدودى الدخل.

الرئيس: وانت تخلف خمس عيال ليه..
ما تخفوا رجليكوا شوية عشان تعرفوا تربوهم.

صلاح: إيه يا عم متولى.. مين الكابتن ده اللي
معاك؟

مقهى الحارة.. الرئيس ومتولى داخلان..
والرئيس متذكر في هيئة الرجل الصعيدي..
صلاح جالساً.. وعبده الضرس وباقى رواد
المقهى والتليفزيون يذيع خطاباً للرئيس.

صلاح ينظر نحو التليفزيون وهو يسمع الرئيس
يتكلم عن اهتمامه بمحدودى الدخل.

الرئيس : سيبك من متولى.. خليك معايا.. إنت عاوز تخلف وتنبسط والحكومة هى اللي تأكلك وتشربك وتعلم ولادك.. لازم تشيل المسئولية شوية.. ولا إيه؟.

صلاح : الأخ ده مين يا متولى.. مخبر؟.

متولى : مخبر مين يا تور.. ده اللي كل المخبرين بيروحوله فى الآخر.

صلاح : يانهار إسود ومنيل.. بياه صول فى الداخلية وانا عكيت أنا قايم.

إنت مش رايح الفرح؟.

متولى : لأ.

صلاح : ده فرح بصله الصبى بتاعك.. معقوله تسيبه ف يوم زى ده؟!

الرئيس : قوم يا متولى.

متولى : على فين يا رئيس؟
على فين يا عمنا؟.

الرئيس : على فرح بصله.

متولى : سعادتك ح تروح فرح بصله؟.
الرئيس : أيوه.

متولى : يا باشا قول كلام غير ده.

الرئيس : ياللا.

متولى : مكتوبالك يا بصلة يا بن العبيطة.

يهمس لمتولى.

الرئيس يضربه على رجله.

قطع

مشهد : 105

ليل / خارجي

سرادق الفرح

متولى : بصلة.. العريس الصبى بتاعى..
وتلميذى.. ابن السيدة عيشة.. الصياعة أدب..
وانا من هنا باحى الباشا الكبير.. عمنا.. اللي
شرفنا ونورنا.. اللي عملنا قيمة.. فى الداخل
وفى الخارج.. وأحل سلام للحكومة واحد
واحد.. ولكبير العيلة.. ورقصنى.

متولى : عارف مين اللي نقطك فى فرحك ده
يا روح امك؟

وصلة : عارفه.. شفته فى سوق العبور.

متولى : سوق العبور يا أهبل.. ده هو العبور
نفسه.. ده الرئيس.

وصلة : رئيس مين؟!

متولى : رئيس الجمهورية.

وصلة : هوه.. والنعمة هوه.

فرح شعبى بسيط للغاية.. وبصلة جالساً فى
الكوشة.. وبجواره عروسة.
متولى ينقط فى الفرح.
الرئيس يزغرله.

الرئيس يخرج ملماً ويعطيه نقطة لمتولى.

متولى هامساً لوصلة فى الكوشة

وصلة ينظر نحوه.

يسقط مغشياً عليه.. والعروس تصوت.. وحالة
هرج ومرج.. تُفاجأ بظهور حازم متخفياً وهو
لا يصدق عينيه مندهشاً.

قطع

مشهد : 106

ليل / خارجي

كورنيش النيل

الرئيس جالساً يتأمل صفحة النيل البديةة.. ومتولى يمتص قصب.. ويلقى بالمحاصص فى النيل.

الرئيس: ياااه.. يا سلام يا متولى.. دى أحلى ليلة قضيتها من 25 سنة.. أول مرة أقعد فى وسط الناس.. أنا.. أنا محروم من الناس يا متولى.

متولى: مش ح ترّوح يا رئيس؟.

الرئيس: لا.. أنا عاوز أقعد ع النيل شوية.. النيل ده أنا بحبه جداً.. ياما غسلت فيه همومى.. من وأنا طفل صغير كنت أول ما الدنيا تضيق بيها.. أجرى على النيل.. و كنت أحس إنه هوه كمان بيجرى عليا.. إنت بتعمل إيه.!!.. حد يرمى الزبالة فى النيل يابنى؟!.

متولى: هى جات على عود قصب يا رئيس.. دول ما سابوش حاجة ما راموهاش فى النيل.

الرئيس: النيل ده يا متولى بالنسبة لى حاجة كبيرة قوى.. أحلامى كلها كانت هنا.. وطموحاتى كلها.. وطفولتى وشبابى.. كنا.. دائمًا نقعد ونأكل بطاطا فى المكان ده.

متولى: نفسك رايحة للبطاطا يا رئيس؟!

الرئيس: آه.. تصور.

متولى: أبص لك على حد يا رئيس.. هما بيعدوا من هنا.

قطع

ضاحكاً.





مشهد : 107

ليل / خارجي

شارع جانبى

حازم : ظابط البطاطا ينزل بسرعة.
صوت : حاضر يا فندم.

حازم فى سيارة.

قطع



مشهد : 108

ليل / خارجي

الكورنيش

الرئيس : إيه ده.. إيه النضاقة دى.. ومتقشرة
كمان ! تعرف يا متولى.. أحمد بييه شوقي كان
بيكتب كل أشعاره وهو هنا على النيل.. العشاق
الفقرا.. كانت دى هى فسحتهم الوحيدة.. هما
راحوا فين العشاق يا متولى.

يمر باائع بطاطا.. وأمامه عربة بطاطا ستانلس
ستيل.. ويقدم للرئيس بطاطا م ملفوفة فى ورق
مفضض.. أنيق للغاية ومقشرة.
يأكل بتلذذ.

قطع

مشهد : 109

ليل / خارجي

شارع جانبى

حازم : اتنين عشاق فوراً يقعدوا على
الكورنيش.

حازم في السيارة.

قطع

مشهد : 110

ليل / خارجي

الكورنيش

متولى : اللي قاعدين دول.. أنا شايفهم في
التليفزيون قبل كده يا رئيس.

مسعدة وعبد السلام الدهشان بملابس
أخرى.. يجلسان وهما ينظران كل منهما نحو
الآخر بهيام وحب جارف.

الرئيس : إيه يا عبد السلام يا دهشان.. إنت
سايب المسرح وجاي تحب هنا؟

الرئيس ينظر حوله وقد فهم كل شيء.

السلام : ربنا يخليك يا رئيس.


عبد السلام ينتفض رعباً.

الرئيس : اسمع يا عبد السلام.. لو شفت وشك
في حته تانى غير المسرح.. ح أدبحك.

السلام : حاضر يا رئيس.

يجري مسرعاً من أمام الرئيس ومعه مسعدة.

قطع



متولى: اتفضل يا رئيس.

الرئيس: قلتلك الكلمة دى ما أسمعهاش منك
هنا خالص.. إنت فاهم؟

التاكسي كان واقفاً.. متولى يفتح الباب للرئيس.

نكتشف أنه نفس السائق الذي هرب من الرئيس
حينما خرج أول مرة.

السائق: على فين يا إخواننا؟

الرئيس: اطلع على مصر الجديدة.

السائق: حاخد أربعين جنيه قبل ما نطلع.
متولى: ما بلاش مع ده.

يركبان وينطلق التاكسي.

قطع

مشهد : 112

ليل / خارجي

شوارع

السائق : شوف البنزين بأه بكام.. ح نعمل
إيه يعني.. ح نجيب منين يا عم الحاج ربنا
ينتقم منهم.

متولى : يا عم اكتم بأه.. وفوت لياتك على خير.
السائق : أنا ما أخافش غير م اللي خلقنى..
أنا قلت الكلام ده للرئيس نفسه.. فى وشه.

الرئيس : قلتهوله إزاي؟!

السائق : ماهو ركب معايا مرة قبل كده.. وأول
ما شفته اتفتحت فيه.. قلت له على كل اللي فى
قلبي.

معاكو بطائق يا أخواننا.. عشان داخلين على
لجنـة بس..

الرئيس : أنا معايش بطـاقة.. تضمنـى
يا متولى؟

متولى : برقبـتـى يا رئيس.

السائق يرى لجنة من بعيد.

الرئيس يبتسم.

الرئيس يلـكـزـ متـولـىـ بيـدـهـ.

السائق ينظر فى المرأة.. يرى الرئيس.

حينـما يسمعـ كلمةـ ياـ رئيسـ.

يفتحـ الـبابـ ويـخـرـجـ مـهـرـوـلاـ مـثـلـ المـرـةـ الأولىـ.

قطع

مشهد : 113

نهار / داخلي

المطبخ

متولى يقوم بعمله فى المطبخ.. يدخل كريم وحازم.

كريم : مبروك يا متولى.

متولى : خير يا باشا!

كريم : مراتك ولدت.

متولى : ياما انت كريم يارب.. ربنا يبشرك يا باشا.

حازم : جابت ولد.. وسميناه محمد.

متولى : أحلى اسم سعادتك.

كريم : ياللا.. روح بأه يا أبو محمد عشان
تشوف مراتك وابنك.

متولى : والمستشفى والـ.

حازم : روح بأه.

متولى : ربنا يخليلك لينا يا باشا.. ربنا يخللى
الرئيس!

يخرج جارياً.

قطع



مشهد : 114

نهار / داخلي

مستشفى راقِ جداً

متولى فى المستشفى .. يأخذه رجال ويوصلونه

بكل حب.

رجل 1 : الأستاذ متولى .. اتفضل .. مبروك.

متولى : الله يخليكم .. هيه فين؟!

صلاح : مبروك يا أبو محمد .. إيه المستشفيات

الشياكة دي .. ده انت طلعت سوسة .. محووش ده

كله علشان تولد مراتك فى مستشفى فخم كده.

أم ان شراح : متولى طول عمره بحبوح

وما يهموش!

يرى أم ان شراح وصلاح والأولاد.

متولى يدخل إلى الحجرة.

قطع

مشهد : 115

نهار / داخلى

حجرة انتراخ بالمستشفى

متولى : مبروك يا انش!
انتراخ : ربنا ما يحرمني منك يا متولى..
وليه كل التكاليف اللى كلفتها لك دى؟!
متولى : ورينى الواد.. عاوز اشوف ابني.
انتراخ : والسلسلة الذهب جبت فلوسها منين
يا متولى.
متولى : السلسلة؟!

آه.. السلسلة.. ده ابني يا انتراخ.. لا يمكن أن
استخسر فيه حاجة.. يا حمادة يا جميل.. هات
بوسة ياله.
الله أكبر.. الله أكبر..
انتراخ : إيه.. واخد الواد ورايح فين؟!
متولى : ابني وبينا أسرار.. عاوز أقول له
حاجة فى ودنه.. انت إيش حشرك بينا.
انتراخ : والله انت اتجنت يا متولى.
متولى : اسمع يا بني.. أنا ح أقولك حاجة مفيش
مخلوق يعرفها فى الدنيا دى غيرك انت.. عارف
أبوك شغال إيه يا محمد.. طباخ الرئيس.

متولى يقبل انتراخ.
يحمل الولد وهو فى قمة السعادة ويدلله.
ينظر فيجاجاً بسلسلة مكتوب عليها محمد أو
مصحف.
يكبر فى أذنه.
يأخذ الولد بعيداً
متولى يختلى بابنه الرضيع.. ثم يهمس فى أذنه.
الولد ينهال على وجه أبيه ويبكي.

قطع



حازم: إنت مش تمسلك لسانك ده يا متولى..!
متولى: عملتها يا محمد.. تبلغ في أبوك وانت
لسه في اللفة.

حازم: إنا أندترتاك قبل كده.. المرة الجاية أنا
ح أتصرف ولا حظ إنك بأيت أب.. يعني راعي
أكل عيشك.. أنت اتكلمت مع سيادة الرئيس على
الحضار المرشوش بمبيدات مسرطنة!؟.

متولى: يا بييه.. أنا الكلام جاب بعضه.. عليا
النعمـة ما أقصد أقول أي حاجة.

متولى جالساً وحازم يعنجه.
لنفسه.

قطع

الرئيس : إنت لسة قاعد عند حماتك يا متولى؟
متولى : أيوه يا باشا.

الرئيس : ولسه خال مراتك والعيال فى الشقة
 برضه.

متولى : ح يروحوا فين يا رئيس.
الرئيس : أمال إنت جبت محمد ابنك ده ازاي؟!
متولى : لا ده كان يوم كده كان ربنا كرمنا فيه
 وحال حماتى مات فى البلد.. أخذت أخوها
 والعيال وراحوا على البلد عشان يعزوا.

الرئيس : وسابولكوا البيت.
متولى : أيوه يا رئيس.

الرئيس : وبهدلتوا الدنيا إنت وانشراح ليتلها.
 طيب مش عاوزين تخاواوا محمد بأه؟!

متولى : ربنا يسهل يا رئيس.. حماتى ليها عم
 ييخلص.. ع التشاطيب يعني.

الرئيس : ومقدمتش ليه فى إسكان الشباب.
متولى : مقدم يا رئيس.. من تسع سنين.

الرئيس : تسع سنين وما استلمتش الشقة.
متولى : والله لو سعادتك تعرف حد فى الإسكان
 بيأه جميل سعادتك فى رقبتى طول عمرى.

متولى يضع الطعام أمام الرئيس.

متولى يضحك فى خجل.

قطع

مشهد: 118

نهار / داخلي

الحاره

متولى: أخيراً بقالنا سرير وأوضة نوم يا انشرح.

انشرح: عيب يا متولى.. إنت مجنون.. إيه

اللى بتعمله ده؟!

متولى: محروم.. محروم يا انشرح.

نرى سرير ودولاب ومتولى يجذب انشرح فى حب.

انشرح تنفلت من يديه.

الكاميرا تتسع لنجد كل هذا فوق سيارة نصف


انشرح: ولاح تلمستنى.

نقل.. فى الشارع متوجهة إلى الشقة الجديدة.

متولى: ليه بس يا انشرح.

انشرح: أما تقولى.. إنت مين بالضبط.

قطع



مشهد : 119

نهار / داخلي

شقة خالية

متولى وانشراح يفتحان الشقة.. وفي يدها الطفل الرضيع.. متولى يحاول أن يقبل انشراح فتمتنع.

متولى : ما ينفعش كده يا انشراح.. عليا النعمة دى أول مرة أحس أنى عريس جديد.. طيب جببى بوسة.

انشراح : أما تقوللى انت شغال إيه بالضبط..
أوعى كده

متولى : ما تضفطيش عليا يا انشراح.
انشراح : خلاص انت حر.

تدخل وتبدأ فى خلع ملابسها.. متولى يجرى مسرعاً.. تفلق الباب.. يطرق الباب.
انشراح تفتح الباب مذعورة.

متولى : انشراح.. أنا طباخ الرئيس يا انشراح.
انشراح : طباخ مين ياخويا!

متولى : طباخ الرئيس يا انشراح.

انشراح : آه.. كده أنا فهمت يا متولى.

متولى : انت ما تعرفيش الرئيس يا انشراح..
الرئيس طيب قوى.. ده حتى أكلته ضعيفة.. الرئيس
بيحبنا.. ونفسه يقرب مننا.. بس فيه ناس حواليه
مش عاوزينه يقرب يا انشراح.

قطع

مشهد : 120

ليل / داخل

شقة متولى.. غرفة النوم

انشراح: خير.. الله أكبر.
متولى: ما تنام بأه يا أستاذ محمد.
انشراح: لازم حلم حلم وحش يا متولى.
متولى: هو ده يعرف يحلم.

متولى نائماً بجوار انشراح والطفل بيكي.
انشراح تهدأ طفل.

صوت جرس الباب.
يقوم من السرير.

قطع

يفتح الباب.. ليجد حازم حسين وفى يده
علبة شيكولاتة.

حازم : إزىك يا متولى.. معلش زيارة مفاجئة
كده فى وقت متأخر شوية.

متولى : يا بيه ده أنا ليا الشرف.. معلش البيت
مش قد المقام.. وليه التعب ده كله يا باشا.

حازم : وازى البيبى؟

متولى : ما يينيمناش يا باشا.. احنا صاحبين
واللهى.

حازم : طبعاً يا متولى.. أنا مقدر ظروفك..
انت بأيت أب وعليك مصاريف.. وأنا عارف
المرتب اللي بتاخده ما يكفيش.

متولى : أهى قضية يا باشا.

حازم : إنت لسه شاب ودى الفترة اللي لازم
تؤمن فيها مستقبل أسرتك ومستقبل الولد.

متولى : ربنا يخليك يا باشا.

حازم : أنا عارف إن موقفك حرج.. وإنانت مش
ح تقدر تقول الكلام ده إنما أنا أقدر أفاتح
سيادة الرئيس فى رغبتك دى.. إحنا ح نقدر
نجيبلك شغلانة فى أى أوتيل كبير.. بمرتب
كويس.. تكون نفسك.

متولى : سعادتك تقصد إيه يا باشا.

حازم : قصدى إنى أعفيك من الحرج.. وأنا
اللى ح أخلص لك الموضوع ده.


متولى : يا باشا أنا مش عاوز أشتغل في أوتيلات.

حازم : يعني إيه؟!

متولى : يعني أنا مش ح أسيب الرئيس لغاية آخر يوم في عمري.

حازم يقف في حزم وغضب ويمضي ويغلق الباب من ورائه.

قطع



متولى ماشياً في الشوارع.. وهو ينظر نحو صورة الرئيس.

قطع



متولى يطرق الباب.

عم سليمان يفتح الباب.

سليمان : متولى.. فيه إيه؟! إيه اللي جابك
ع الصبح كده.. تعالى خش يا متولى!.

قطع



مشهد : 124

نهار / خارجي

صاله بيت عم سليمان

نرى صورة الرئيس فى بيت عم سليمان وبجوارها
صورة زفاف أولاده.

سليمان : خير.

متولى : إنت عايش لوحدك.

سليمان : أيوه.. العيال اتجوزوا وكل واحد فى
بيته وأنا خلاص بأيت معاش.

متولى : الظاهر إنى ح أطلع معاش بدرى أنا
كمان يا عم سليمان.

سليمان : ليه.. إيه اللي حصل؟!.

متولى : عاوزيني أسيب الشغل عند سيادة الرئيس.

سليمان : آه.. تباء فتحت بقك واتكلمت يا متولى.

متولى : أنا ما قولتش لسيادة الرئيس حاجة
غلط.. أنا قولت له اللي أنا شايشه بعينيا.

سليمان : ما هوده اللي طلعنى معاش يابنى.. إنت
فاكر إن السن هو اللي طلعنى معاش.. اللي طلعنى
أنى قولت لسيادة الرئيس وكلامى ماعجبهمش..
بس أنا قعدت سنين على بال ما اتكلمت.. إنما
إنت داخل شاطح كده.. زى القطر.


متولى : والعمل يا عم سليمان.

سليمان : تسك.

متولى : ما أقدرش يا عم سليمان.. ماقدرش
الرئيس يسألنى وأكدب عليه ولا.

سليمان : بياه ح تقدر قعدتى دى!.

قطع



حازم: ده التقرير الطبى بتاعه يا فندم..
عنه فيروس (سى) ولازم يتعالج.

الرئيس: لازم تعالجوه كويس وفى أحسن
مستشفى.

حازم: طبعاً يا فندم اللازム كله ح يتعمل.
الرئيس: وطمئنونى عليه أول بأول.

حازم: حاضر يا فندم..!

الرئيس: فيه حاجة يا حازم.

حازم: فيه طباخ جديد هايل اختبرناه يا فندم
وبنستاذن سعادتك إنك تشوفه.

الرئيس: طيب.. طيب.

حازم: تعالى يا حسنين.

الرئيس: إنت متتجوز يا حسنين.

حسنين: أيوه يا سيادة الرئيس متتجوز.

الرئيس: عندك كام عيل.

حسنين: عندى خمس عيال.

الرئيس: قوللى يا حسنين.. هو طبق الكشرى
بكام.

حسنين: بنص جنيه يا رئيس.

الرئيس: والرغيف المُدعم.. حجمه قد إيه
تقريباً.

حازم حسين أمام الرئيس.

يدخل الطباخ الجديد بالطعام ويضعه أمام
الرئيس.

الرئيس ينظر نحوه.. ونحو الطعام.
حسنين يجيب بطريقة محفوظة مدرب عليها
وحازم يومئه برأسه سعيداً بإجابات حسين.

حسنين: قد كدهوه.
الرئيس: أنا ما باكلش من الكلام ده.

يشير إلى أنه كبير.
الرئيس ينحى الأطباق جانبًا.

قطع




متولى: حرام عليكوا يا ناس.. ده محل أكل عييش
يا اخواننا.. حسبى الله ونعم الوكيل ع الصبح.
إيه اللي جابك انت كمان يا انشرح.
انشرح: فصلونى من المدرسة يا متولى.
متولى: يعني أحنا الإتنين بأينا فى الشارع.

متولى أمام العربة.. والبلدية تلم الكراسي
والحلل.. ومتولى يصرخ.

متولى في قمة الغيظ.. يجد أمامه انشرح.

تجلس بجواره على الرصيف.. متولى ينظر لنجد
صورة كبيرة للرئيس وهو يحيى الجماهير.

قطع





مشهد : 127

ليل / خارجي

أمام بيت متولى

سيارة سوداء بزجاج فاميه تقف أمام المنزل
ووراءها سيارتان.. ينزل منها بودي جاردز
(الحرس) ثم نرى الباب يفتح.. وقدم تنزل
من السيارة الأمامية على الأرض.

قطع




مشهد : 128

ليل / داخلي

داخل شقة متولى ..
حجرة النوم

على السرير متولى وانشراح وبينهما الطفل
محمد يقومان على صوت طرق على الباب ..
يذهبان إلى الصالة الخارجية.

قطع



مشهد: 129

ليل / داخل

الصالحة

متولى يفتح الباب.. وخلفه تقف انشراح ليفاجأ
بأن الذى على الباب هو السيد الرئيس.

الرئيس: إيه يا متولى.. إنت نايم والا إيه!
متولى: النايم يصاللك يا ريس.. فخامتك
بنفسك.. أنا مش مصدق نفسى.. سيادة
الرئيس يا انشراح.
الرئيس: إيه أنا ح أفضل واقف على الباب
كده!!.

انشرح: اتفضل يا ريس.

الرئيس: إزيك يا انشراح.

انشرح: الله يسلامك يا ريس.

الرئيس: ما هى شقة حلوه أهيه.. أمال بيقولوا
ضيقه يعني!!.

متولى: من خيرك يا ريس.

يدخل.

يجلسون.

ينظر حوله.

الرئيس يتناول قله موجوده بجواره ويشرب
منها.

الرئيس: إنتوا لسه ما جبتوش تلاجه.

متولى: قسطها حراق يا ريس.

الرئيس: وإنك صحتك عامله إيه دلوقت
يا متولى.

متولى: زى البمب يا ريس.

انشرح: المشكلة مش فى الصحه.

الرئيس: أمال فى إيه يا انشراح.

انشرح: المشكلة فى الصحة والتعليم
والبطالة والفساد.

يقطّعها ويُلْكِزُها بيده.

متولى : إهتمى يا ان شراح.

الرئيس : سبها.. سبها يا متولى.. أدينا

بنحاول يا ان شراح نعمل كل اللي في وسعنا.

أعمل إيه بس.. أعمل إيه!.. ضغوط علينا من

بره ومن جوه.. ومفيش حد حاسس باللي احنا

فيه.. ولا حد عاجبه حاجة.. أسيب الحكم

وأمشي يعني.

الله.. إنتوا عاوزيني أمشي؟!.. مابتردش ليه.

متولى : لا يا رئيس قطع لسان اللي يقول كده..

ح تمشى وتسيبنا لمين يا رئيس.

الرئيس : انتوا فاكرين الشيله سهلة.. ده هم..

مش هم واحد.. إنتوا بأيتها 75 مليون.

ان شراح : 75 مليون ومش قادرین نتكلم يا رئيس!..

الرئيس : ما تتكلموا إنتوا خايفين من إيه!..

متولى : أنا مش خايف غير على إبني يا رئيس.

الرئيس : خايف عليه من إيه!..

متولى : خايف ياخذ رضعه لbin يطلع ملوث..

خايف يجيشه التهاب رئوي من الهواء الملوث

اللي حوالينا ومعرفش أعالجه.. خايف ييجي

يخشن المدرسه ما يلاقيش دكة يقعد عليها..

خايف يتخرج من الجامعة ويقعد في أرابيزى

20 سنة مش لاقى شغل.. خايف يحب واحدة

وما أقدرش أجوزه الله.

الرئيس : وانت يا ان شراح.. خايفه من إيه انت

كمان؟.

ان شراح : خايفه يا رئيس يطلع ما يلاقيش له

أى حقوق.. خايفه ما يبألوش صوت ولا حد

يسمعه.. خايفه يكره البلد اللي كُلنا حبيناها.

الرئيس : وح تفضلوا خايفين كده على طول.

الإثنان : ح نعمل إيه يا رئيس.

في عصبيه.

يصمتان.

صمت.

أعمل إيه بس.. أعمل إيه!.. ضغوط علينا من

بره ومن جوه.. ومفيش حد حاسس باللي احنا

فيه.. ولا حد عاجبه حاجة.. أسيب الحكم

وأمشي يعني.

الله.. إنتوا عاوزيني أمشي؟!.. مابتردش ليه.

متولى : لا يا رئيس قطع لسان اللي يقول كده..

ح تمشى وتسيبنا لمين يا رئيس.

الرئيس : انتوا فاكرين الشيله سهلة.. ده هم..

مش هم واحد.. إنتوا بأيتها 75 مليون.

ان شراح : 75 مليون ومش قادرین نتكلم يا رئيس!..

الرئيس : ما تتكلموا إنتوا خايفين من إيه!..

متولى : أنا مش خايف غير على إبني يا رئيس.

الرئيس : خايف عليه من إيه!..

متولى : خايف ياخذ رضعه لbin يطلع ملوث..

خايف يجيشه التهاب رئوي من الهواء الملوث

اللي حوالينا ومعرفش أعالجه.. خايف ييجي

يخشن المدرسه ما يلاقيش دكة يقعد عليها..

خايف يتخرج من الجامعة ويقعد في أرابيزى

20 سنة مش لاقى شغل.. خايف يحب واحدة

وما أقدرش أجوزه الله.

الرئيس : وانت يا ان شراح.. خايفه من إيه انت

كمان؟.

ان شراح : خايفه يا رئيس يطلع ما يلاقيش له

أى حقوق.. خايفه ما يبألوش صوت ولا حد

يسمعه.. خايفه يكره البلد اللي كُلنا حبيناها.

الرئيس : وح تفضلوا خايفين كده على طول.

الإثنان : ح نعمل إيه يا رئيس.

الرئيس : إتكلموا.. إنزلوا من بيوتكم.. وروحوا
انتخبوا اللي أنتوا عاوزينه.. ماحدش بيبع صوته
بقرازة زيت ولا 50 جنيه.. إنت مش إنتخبتني
يا متولى.

متولى : طبعاً يا رئيس.

الرئيس : وانت يا انشراح.

انشراح : لا يا رئيس.!

الرئيس : وأهو أدينا قاعدين مع بعض إحنا
الثلاثة.؟

الرئيس : ده محمد.!

بسم الله ما شاء الله.

إيه ده.. ده شعره شايب خالص.

متولى : من الذل اللي حيشوفه يا رئيس.!

صوت بكاء محمد من الداخل.

الرئيس مبتسمأً.

انشراح تخرج بالطفل الرضيع.

الرئيس يحمله.. فتجد شعره كله أبيض وقد
شاب مبكراً.

الرئيس يضحك وصوت بكاء عال جداً.

قطع

مشهد : 130

نهار / داخلي

حجرة نوم متولى

متولى يقوم مفروعاً من النوم.. انشراح تقوم على صراغه.

متولى يقوم بالفانلة الداخلية وبنطلون البيجاما ويلبس الشيشب الزنobia ويخرج من الحجرة.
قطع

مشهد : 131 °

ليل / داخلي

بيت متولى.. الصالة

انشراح: انت رايح فين يا راجل.. ما ترد عليا.

متولى: سيبيني يا انشراح.. أنا لازم أروح للرئيس.. لازم أعرفه اللي بيحصل فى البلد.

انشراح: ح تروح له كده يا مجنون.

متولى: أوعى يا انشراح.. أوعى.

انشراح: يا متولى.. يا متولى.

متولى يفتح الباب خارجاً.

متولى يغلق الباب وهى تنادى عليه.

قطع



متولى: عاوز أكلمك يا رئيس.. عاوزك تسمعني
يا رئيس.. الكشري بخمسة جنيه يا رئيس..
واللhma بستين جنيه يا رئيس.. والأنابيب بتقرقع
فى وشنا يا رئيس.. والدم ملوث يا رئيس.

متولى واقفاً أمام صورة ضخمة للرئيس وهو يصرخ وقد التف حوله بعض الناس.. يتزايد عددهم تدريجياً.

عربة شرطة وعربة إسعاف تدخل الكادر وقد تكاثر عدد الناس حول متولى.

قطع





مشهد : 133

نهار / داخلى

مانشيت جريدة

مانشيت على إحدى الجرائد.
القبض على مختل عقلياً يحاول إثارة الشغب
والبلبلة في الشارع المصري ويدعى أنه كان
طباخ الرئيس.
وصورة لمتولى بقميص المجانين.

قطع



كتب للمسرح والسينما والتليفزيون والإذاعة وكتب للصحافة مقالات ساخرة وأبواباً من أشهر الأبواب في الصحافة العربية.. واليوم ونحن نقدم له أعماله السينمائية في سلسلة جديدة والتي كان نجم نجوم العالم العربي الفنان القدير عادل إمام قاسماً مشتركاً معه في معظم أعماله التي أثارت الكثير من الآراء في الصحافة العالمية - بدأ بفيلم طباخ الرئيس ثم تبعه بأفلامه مع الفنان الكبير عادل إمام.

الناشر

الأعمال السينمائية

- * ياتحب ياتقب . * ح نحب ونقب. * الواد محروس بتاع الوزير.
- * التجربة الدانمركية. * عريس من جهة أمنية. * السفاراة في العمارة.
- * مرجان أحمد مرجان. * طباخ الرئيس. * حسن ومرقص.

كثيراً ماتمنيت أن أعرض السيناريو الذي أكتبه على المشاهد العادى لأعرف رأيه قبل أن يصور الفيلم ويعرض في السينما .. وظللت هذه الفكرة المجنونة تلح على رأسي .. فأصعب مراحل العمل الفنى .. هو انتظار عرض الفيلم ليعرف الكاتب رأى الناس .. بعد أن اقنع المخرج والمنتج والممثلين .. الأهم أن يقتنع الناس .. ولكن هذا لك يحدث أبداً وظللت أعانى تلك المعاناة المؤلمة قبل نزول الفيلم في كل مرة .. والسيناريو الذي بين يديك ياعزيزى القارئ .. هو النسخة الكاملة لفيلم طباخ الرئيس كما كتبته على صورته الأولى .. والذى شجعنا أنا وصديقى الناشر المثقف المحترم محمد رشاد على أن نطبع هذا السيناريو، ونبداً هذه الخطوة بالإقبال الجماهيرى الكبير، الذى لاقاه الفيلم والضجة التى آثارها حين عرض فى دور العرض.. ونحن نحلم.. يوماً ما .. أن نقدم للقارئ سيناريوهات لم تصور ولم تعرض فى دور السينما.. نقدمها للقارئ أولاً.. فإذا أحسستنا بأنها حازت القبول ربما تحولها إلى شرائط سينمائية بعد ذلك .. إنها تجربة ديموقراطية فى الكتابة يكون للقارئ العادى الحكم والرأى النهائى فيها..

يوسف معاطى...